



史部傳記類



至聖先師孔子刊定世家卷五



明兵部職方清吏司主事浙慈後學馮烜謹輯

高宗建炎二年五月定詩賦試士法元祐中經義詩賦兼取紹聖來罷詩賦至是命參酌元祐科舉條制定試士法習詩賦舉人不兼經義人止習一經解試省試並計數各取通定高下殿試仍對策三道○九月庚寅賜禮部正奏名李易以下四百五十一人進士及第進士出身同學究出身同出身第一人爲左宣教郎第二第三人左宣義郎第四第五人左儒林

郎第一甲第六名以下並左文林郎第二甲並左從事郎第三甲以下並左迪功郎特奏名第一人附第二甲賜進士及第第二第三賜同進士出身餘賜同學究出身登仕郎京府助教上下州文學諸州助教入五等者亦與調官川陝河北京東正奏名不赴者一百三人以龍飛特恩卽家賜第故事廷試上十名內侍先以卷奏定高下帝曰取士當用至公豈容以己意升降自今勿先進卷

三年左司諫唐煇言舊制省試用六曹尚書翰林學士知貢舉侍郎給事中同知貢舉鄉監郎官叅詳館職學官點檢御史監視故能至公厭人心今諸道類試顯委憲臣姦弊滋生才否貿亂士論囂然甚不稱更制設科之意請並還禮部遂罷諸道類試四年復川陝試如故○詔國子監併歸禮部未幾詔復養生徒置博士

四年五月癸亥詔中原淮南流寓士人聽所在州郡附試

高宗紹興元年二月丙申詔諸路提刑司以八月類

省試張浚亦以便宜合川陝舉人卽置司類省試○  
侍御史曾統請取士止用詞賦未須兼經高宗亦以  
古今治亂多載于史經義登科者類不通史將從其  
議左僕射呂頤浩曰經義詞賦均以言取人宜如舊  
遂止

五年三月御試奏名汪應辰第一初考官以有官人  
黃中第一帝訪諸沈應求應求以沈遵與馮京故事  
對乃更擢應辰爲魁遂爲定制○八月己未命廣宮  
學教內外宗子

六年春正月丁丑詔入粟補官者毋授親民刑法之  
職

七年五月壬申命禮官舉文宣王武成王熒惑壽星  
嶽鎮海瀆農蠶風雷雨師之祀

八年時聞徽宗崩未及大祥禮部言故事因諒闇罷  
殿試則省試第一人爲榜首補兩使職官帝特命爲  
左承事郎自此率以爲常○六月賜衍聖公孔玠衢  
州田五頃以奉先聖祠玠端友子也以紹興二年嗣  
當建炎中興舜亮之少子若古改名傳拜闕下敘家

門舊典始寓居三衢傳爲玠之叔祖于是孔氏有因  
仕而居于霅川新安臨川鄂渚者皆自衢而分傳知  
邠杖撫三州有政績號杉溪生六子長端問奉新丞  
次端守端已端位府錄參端植武康丞端隱江陵察  
推而舜亮長子若升之子端朝爲若谷舜亮次子後者紹  
興二年逃虜難南奔生生所資皆失之獨闕里譜系  
山中人得之轉以見歸因補錄至紹興五年洪興祖  
刻于廣德郡齋而五年以後至景定三年則五十一  
代孫台州太府應得時添差廣德軍通判又附入之  
玠爲四十九代玠傳措措傳文遠文遠傳萬春理宗  
寶慶二年六月嗣萬春傳洙爲五十三代皆封衍聖  
公而文遠歷吉州隆興府通判洙添差通判平江府  
又得與流官不復遵宗翰所請矣

十年詔文宣王與大社大稷並爲大祀○詔諸州依  
條發解

紹興十一年

金熙宗皇  
統元年

高宗正博學宏詞科凡十二

題制誥詔表露布檄箴銘記贊頌序內雜出六題分  
爲三場每場體制一古一今遇科場年應命官除歸

明流外入貲及犯贓人外公卿子弟之秀者皆得試  
先投所業三卷學士院考之拔其充者召試定爲三  
等上等轉一官選入改秩無出身人賜進士及第並  
免召試除館職中等減三年磨勘與堂除無出身人  
賜進士出身下等減二年磨勘無出身人賜進士出  
身並許召試館職南渡以來所得士多至卿相翰苑  
者○金主親祀孔子北面再拜退謂侍臣曰孔子雖  
無位其道可尊使萬世景仰大凡爲善不可不勉

紹興十二年

金皇統二年

正月省試三月御試後皆準此

○四月甲申增修臨安府學爲太學○金勅免孔氏  
子孫賦役

紹興十三年春正月癸卯增建國子監太學置太學  
祭酒司業各一員博士三員正錄各一員養士七百  
人上舍人三十員內舍生百員外舍生五百七十員  
乙巳國子司業闕言取士當先經術請參令三場  
以本經語孟義各一道爲首詩賦各一首次之子史  
論一道時務策一道又次之庶幾如古試法又春秋  
義當于正經出題並從之○二月庚辰立大學及科

舉試法○三月帝謁孔子廟遂視學秦禧執經高閔講易泰卦胡宏移書責之○夏四月癸亥頒鄉飲酒儀于郡國○五月壬申置國子博士正錄○八月丁亥命諸路有出身監司一員提舉學事○九月癸酉詔諸州守二提舉學事縣令佐主管學事○冬十月己丑秦棒上監學勅令格式○十二月丁酉增太學弟子員二百丁未命行在宗子入宮學

紹興十四年始建宗學于臨安生員額百人太學生五十人小學生四十人職事各五人置諸王宮大小學授一員在學者皆南宮址宅子孫若親賢宅近屬則別選館職教授初行在宗室試國子監者有官鎖廳七取其三無官應舉七取其四無官袒免親取應文理通爲合格不限其數而外任主宮觀嶽廟試于轉運司者取放之額同進士○三月己巳御幸太學祇謁先聖止駕於大成門外登降步趨執爵灌獻禮畢御敦化堂頒詔示樂育之意躬睹徽宗大成樂成詔頒降肄習仍內降玉圭御製宣聖及七十二賢贊有引朕自睦鄰息兵首開學校教養多士以遂忠良

躬幸太學延見諸生濟濟在庭意甚嘉之因作文宣  
王贊機政餘閒歷取顏回而下七十二人亦爲製贊  
用廣列聖崇儒右文之聲復知師弟間纓弁森森覃  
精繹之訓其於治道心庶幾焉贊曰大哉宣王斯文  
在茲帝王之式古今之師志則春秋道由忠恕賢於  
堯舜日月其喻惟時載雍戢此武功肅昭盛儀海宇  
聿崇○贊顏子曰德行首科顯冠學徒不遷不貳樂  
道以居食飲甚惡在陋自如宜稱賢哉豈止不愚○  
曾子曰夫孝要道用訓羣生以綱百行以通神明因

子侍師答問成經事親之實代爲儀刑○閔子曰天  
經地義孝哉閔騫父母兄弟莫間其言汙君不仕志  
氣軒軒復我汶上出處休焉○冉雍曰懿德賢行有  
一則尊子也履之成性存存驛角有用犁牛莫論刑  
政之言惠施元元○冉耕曰德以克性行以澡身二  
事在躬日躋而新並驅賢科德顏與隣不幸斯疾命  
也莫伸○冉求曰循良之要在於有政可使爲宰千  
室百乘師門育材治心扶性退則進之琢磨之柄○  
言偃曰道義正己文學擅科爲宰武城聊以弦歌割



鷄之試牛刀謂何前言戲爾博約則多○宰予曰辨  
以飾詐言以致文苟勿執禮宜莫釋紛朽木糞墻置  
不足云言語之科燁然有聞○仲由曰升堂惟先千  
乘惟權陵暴知非委質可賢折獄言簡結纓禮全惡  
言不耳仲尼賴焉○端木賜曰謙德知二器實瑚璉  
動心幾先孰並其辨一使存魯五國有變終相其主  
譽處悠遠○卜商曰文學之目名重一時爲君子儒  
作魏侯師不可後禮始可言詩假蓋小嫌聖亦不疵  
○林放曰禮之有本子能啓問大哉斯言光昭明訓

德輝泰山誣祭莫奮崇茲祀典盍永令聞○樊須曰  
養才以道聖人兼濟始謂非仁問辯良喜寓志農圃  
似睽仁義學稼之辭豈姑舍是○澹臺滅明曰惟子  
有道天與異容狀雖云惡德則其豐南止江沱學者  
雲從取士自茲貌或非公○公冶長曰子長宏度高  
出倫輩雖在縲紲知非其罪純德備行夫子所采以  
子妻之尤知英槩○公西戡曰倚爾子上魯邦之望  
以德則貴惟道是唱師聰師明友直友諒伯於祝阿  
儒風斯暢○原憲曰軾彼窮閭達士所賓邦無道穀

進退孰倫敝衣非病無財乃貧賜雖不懌清節照人  
○有若曰人稟秀德氣貌或同而子儼然溫溫其容  
兩端發問未啓幾鋒以禮節和斯言可宗○鄭國曰  
伯夫滎陽實惟令德優入聖門過不留跡道以目傳  
妙則心識猗歟偉歟後代之式○商澤曰邈矣子秀  
睢陽是伯屏息受業延教登席未踐四科周涉六籍  
祀典載之好是正直○秦非曰樂善哲士伯于汧陽  
傳道克正垂名允臧執德以弘用必剛衰廣業履  
式贊素王○曾點曰惟時義方有子誠孝怡怡聖域  
俱膺是道暮春舞雩詠歌至教師故與之和悅宜召  
○巫馬施曰天清日明密雲曷有師命持蓋子亦善  
扣惟夫子傳三才允究學者之樂所得遂茂○公皙  
哀曰周衰僞隆政在羣公廉耻道微家臣聿崇不爲  
屈節撓默自容子於是時凜然清風○漆雕徒父曰  
遐想子期挾策聖帷涉道是嗜微爵可縻在德旣賢  
在名乃垂洋洋之風逮今四馳○司馬耕曰手足甚  
親志異出處難將爲亂子乃脫去在污能潔危而有  
慮內省若斯何憂何懼○顏之僕曰賢行顏叔親承

尼父志銳所期道尊是輔泥在鈞陶木就規矩終縻  
好爵揚名東武○石作蜀曰在昔石邑能知所尊懋  
依有德克述無言鼓篋槐市場揚名里門此道久視彼  
美長存○顏高曰瑯琊之伯其惟子驕微言旣彰德  
音孔昭已詠雩舞同聽齊韶歷千百年豉思高標○  
邾巽曰彼美邾子先聖是承墻仞已及堂陛將升良  
玉斯琢寒水必冰錫壤平陸茂實騫騰○任不齊曰  
任城建伯其表曰選淑問雅馳才華清遠競辰力行  
愛日黽勉孔教崇崇令緒顯顯○顏無繇曰人誰其  
子爾嗣標竒行爲世範學爲人師請車誠非顧匪其  
私千載之下足以示慈○顓孫師曰念昔顓孫商德  
與隣學以干祿問以書紳參前倚衡忠信是遵色取  
行違作戒後人○高柴曰婉彼子羔受業先聖宗廟  
之問一出乎正克篤于孝非愚乃令師知其生有輝  
賢行○榮旂曰伯茲雩婁務學實著三千之徒七十  
是預匪善莫行惟德乃據紀于前書式彰厥譽○秦  
祖曰秦有子南贄贄述作守道之淵成德之博範若  
鑄金契猶發藥歷世明祀少梁寵爵○陳亢曰惟禽

升定世集卷一  
之問過庭其鯉求以異聞詩禮云爾請一得三誠退  
而喜且知將聖不私其子○梁鱣曰室家壯年無子  
則遂見於信史全齊之俗原本厥初師言可復以學  
則知揆之宜篤○冉孺曰紀伯子魯聖學是務勵已  
斯約好問乃裕周旋中規容止可度允矣昔賢後世  
所慕○蘧瑗曰有衛伯玉夫子與居寡過未能薦贊  
使乎以屍諫君友則史魚果得進賢爛然簡書○公  
西赤曰學者行道敝緼亦稱使齊光華偶爲肥輕周  
急之言君子所令答問允嚴理皆先經○公伯寮曰  
人有道否道有廢興子如命何營營震驚季孫雖惑  
景伯莫平師資一事秩祀亦懲○漆雕開曰仕進之  
道要在究習具居而居咎欲誰執斯未能信嫌以有  
立闕里說之多士莫及○宓不齊曰君子若人單父  
之政引肘寤君放魚稟令傳郭勿獲遂能制命百代  
理邑用規觀政○燕伋曰師席高振大成是集至道  
克傳賢達斯執善教云衰儒風可立漁陽之士得跂  
而及○秦商曰孔父秦父相尚以德俱生賢嗣相與  
維則是父是子致詰疇克會弁儒林令名無極○后

處曰溫溫子里入聞至聖攬道之華秉德之柄深造  
闔域不乖言行全齊之封竹素榮盛○廉潔曰兄弟  
之邦士有廉庸涵泳素教表揭儒宗杏壇探賾洙泗  
從容作興一時莒父其封○樂欵曰樂氏子聲錫爵  
昌平信道之駕見善乃明引領高節載惟思誠先賢  
聿崇出爲時英○南宮适曰先覺旣佐簪履並馳尚  
德君子爾乃兼之羿皋可慙禹稷可師三復此道載  
觀白圭○公孫龍曰黃伯著祀公孫是云彌縫中道  
協輔斯文藏脩方異漸漬甚勤史詞不忘播爲清芬

○叔仲會曰瑕丘祚邑子期是爲親訓有日廣業于  
時四教允隆五常以持比肩傑俊聞望斯垂○商瞿  
曰易之爲書彌綸天地五十乃學師則有是子能授  
受洗心傳世知幾其神宜被厥祀○曹卹曰肅肅曹  
伯王室之裔積習樂道切磋明義惟善則至爾德是  
類史筆有煥令名永紀○縣成曰至聖立教子祺安  
雅擅譽魯邦啓祚鉅野煒矣風猷時哉用舍出倫離  
類後學是假○顏噲曰褒錫朱虛在器輪輿儒室振  
領聖門曳裾賢業素蘊美才以摠百世不刊載觀成

書○孔忠曰惟子挺生道德之門佩服至論鯉則弟  
昆二得二已所問殊溫君子歸宓義不掩恩○狄黑  
曰仰止狄皙抱負淵通游泳德化揚厲素風偉識旣  
異持教乃隆厥志茂馬毖祀無窮○冉季曰東平子  
產姓著盛時奉師於塾講道之微答問甚敏淵妙以  
思升降陞庶尚想英姿○申黨曰佻佻申周四科與  
儔逸駕文囿鼓柝儒流冠佩旣燕言動允休邵陵得  
封可想前脩○琴牢曰多能鄙事聖人曲意惟其知  
之是以不試宗魯雖友弔必以義尚師嘉言祀亦罔  
替○步叔乘曰勉勉子車封邑淳于親炙避席唯喏  
趨隅發微旣博雅道是扶抑可尚也不亦美乎○顏  
辛曰孰封于蕭實惟子柳夙飫格言克尊善誘明德  
斯馨賢業所就以侑於儒傳芳逾茂○漆雕哆曰子  
歛受封爰居武城疊疊其聞翩翩其英樞衣時習願  
學日明誕敷孔教爵里䟽榮○申枨曰剛毅近仁志  
操莫渝性匪祝鮒面豈子都有一於此剛名可圖云  
欲則柔蓋生之徒○壤駟赤曰式是壤伯昭乎聖徒  
執經請益載道若無詩書規矩問學楷模得時而駕

領袖諸儒○施之常曰開國乘氏有德斯彰參稽百  
行贊理三綱自拔行間策名甚光在史藹藹歷久彌  
芳○公祖句茲曰惟彼子之錫伯期思與賢並進得  
聖而師彬彬雅道翼翼令儀上目至言廟食不隳○  
伯虔曰有懷子楷全魯之彥儒行旣名聊伯乃建統  
統受道奕奕我弁懿選嘉封世享馨薦○奚容蒧曰  
雍容子哲已望堂堂幼則有造成則祖述文采日化  
儒効力弼永觀厥成德音秩秩○左人郢曰伯彼臨  
淄江行稱賢晞蹤中哲秀穎三千心悅誠服家至戶  
傳樂只君子文聲益宣○秦冉曰彭衙高士經籍是  
親贊成德藝協於彛倫底績聖道期肖素臣優哉游  
哉學以致身○六月乙巳置國子監小學○秋七月  
丙寅立明法科兼經法

十五年春正月己未分經義詩賦爲兩科取士○命  
諸路宗室願赴行在試者依熙寧舊制並國子監請  
解不願者依崇寧通用貢舉法所以優國族也○二  
月戊寅增太學弟子員百人○八月辛丑復增太學  
弟子員二百

十六年春正月戊子增太學外舍生額至千人○三月庚午朔建武學置弟子員百人

十七年春正月己巳命諸路收試中原流寓士○申禁程文全用本朝人文集或歌頌及佛書全句者皆不收考○辛卯以舉人多冒貫命州縣每三歲行鄉飲酒禮以貢士○十一月丁卯復賜進士聞喜宴十九年十二月己未詔無子女戶得解舉人太學生之獨居者並免役

二十一年御試得正奏名四百人特奏名五百三十一人中興以來得人始盛○九月戊戌朔籍寺觀絕產以贍學

二十四年舊諸州皆以八月選日試舉人有趨數州取解者是年正月癸酉初詔試期並用中秋日四川則用季春而仲秋類省

二十六年二月己卯定諸州流寓士人解額○夏四月癸巳置武學官及弟子員百人戊戌立六科以舉士罷鄉飲酒舉士法○六月戊寅復權要親族中第覆試法乙酉詔取士無拘程願王安石一家之說



二十七二年二月丁酉朔復兼習經義詩賦法

二十八年八月乙未增四川十七州舉人解額○十  
二月辛丑修睦親宅建宮學

三十一年二月乙丑禮部侍郎金安節言熙寧元豐  
以來經義詩賦廢興離合隨時更革初無定制近合  
科以來通經者苦賦體雕刻習賦者病經旨淵微心  
有弗精智難兼濟又其甚者論既併場策問大寡議  
論器識無以盡人士守傳注史學盡廢此後進往往  
得志而老生夙儒多困也請復立兩科永爲成憲從  
之于是士始有定嚮而得專所習矣

宋孝宗隆興元年召建寧布衣魏掞之爲太學錄時  
將釋奠孔子掞之請廢安石父子勿祀而追爵程氏  
兄弟使從祀不聽○春正月戊申詔禮部貢院試額  
增一百人○御試第一人承事郎簽書諸州節度判  
官第二第三人文林郎兩使職官第四第五人從事  
郎初等職官第六人至第四甲並迪功郎諸州司戶  
簿尉第五甲守選詔量試不中年四十以上補承信  
郎展三年出官餘並於後舉再試四月御射殿引見

升定世家集卷之六  
取應省試第一人賜同進士出身第二第三人補保  
義郎餘四十人承節郎七人承信郎凡宗室鎖廳得  
出身者京官進一秩選人比類循資無官應舉得出  
身者補修職郎濮秀二王下子孫中進士舉者更特  
轉一秩

四年二月帝謁孔子遂臨太學

孝宗乾道二年授四十九代白身最長孔琬迪功郎  
誥曰使不胥爲夷者夫子之賜也讀其書而不錄其  
苗裔可乎今襲封言爾最長有司如其故事官之以  
稱朕尊崇先聖之意是代瓚瓚璣瓚瓚瓚瓚瓚管皆  
以白身最長授迪功郎瓚終朝請郎璣管終從仕郎  
璞瓚皆奉南嶽祠璞誥曰夫子之道與天地並有國  
家者必紹厥封所以示無窮之報我朝旣推其嫡以  
襲封復官族屬以廣愛焉終贈太子少傅所著景從  
子傳于世瓚誥曰有補斯文當代不廢矧先聖之裔  
尤當錄用宜授其祿以榮其身尚其懋哉五十代孔  
扶亦以最長恩授迪功郎

職方氏曰此聖門官宗子外又官最長之始至國

朝爲族長五十代扶以族長權奉祀事是也若五十一代元長元讓權主祀事元量權句祀事五十二代之深主奉祀事之文五十三代演權主祀事五十四代思進權奉祀事想非宗子則族長而不可知矣至五十五代克進克旻克煦皆以三代學錄兼族長五十六代希晟以族長賜冠帶希瑾希瑄五十八代公寵皆以族長賜壽官五十七代譁譔皆以陪幸太學賜壽官冠帶予嘗謂古人得行宗子之法以封建時同姓之宗卽異姓之君故法立而不犯近代亦惟公侯武職之世襲者猶或可行而若以素封行世職事是以郡縣行封建法此法之必不可通者也故近代素封之家惟取行分最尊中之最長者以統族人庶爲得之卽如孔氏宗子得世襲封衍聖公此與公侯武職世家不異宜無不行之法然宋孝宗朝孔璉以白身最長誥授迪功郎誥稱襲封言爾最長有司如其故事官之則知官宗長之法其來已久蓋古人雖重嫡子以明宗而亦必推分尊以明長宗子不得以嫡貴

抑之

世廟三十二年勅衍聖公貞幹督率族長舉事管束族衆各遵禮法爾宜修德謹行以先之如有恃強挾長朋謀爲非聽爾同族長查照家範發落重則指名具奏依法治罪此

世廟之洞燭民隱而必舉宗子與族長而兼重也至隆慶三年衍聖公尚賢具奏族屬愈繁善惡宜別穆宗特允所請降勅申勅族人如有輕犯國典不守家法恃強挾長背違教令者輕則查照家範發落

重則參奏依法治罪爾尤宜正己率人砥德礪行以先之而更不及族長則尚賢之恐族長侵權而故欲得此專勅也然詳味兩勅皆有挾長一語是宗子法雖世祿聖門亦難必行而又何望于齊民素封哉且衍聖公但以宗法主廟事而世尹又得以國法治縣事卽衍聖世襲亦與古時封建不同而世尹嘗與衍聖公不睦動輒訐奏蓋內則有宗長抗于家而外則有世尹抗于縣此宗法所以難行周子謂家難而天下易以家親而天下疎也而

泥古之儒欲為一切之法者可以省矣

二年御試始推登極恩第一名宣義郎第二名與第  
一名恩例第三名承事郎第一甲賜進士及第竝文  
林郎第二甲賜進士及第竝從事郎第三第四甲進  
士出身第五甲同進士出身特奏名第一名賜進士  
出身第二名三名賜同進士出身○八月甲戌罷壬  
子年三十得免試參選之令

乾道六年帝欲令文士能射御武臣知詩書命討論  
殿最之法

孝宗淳熙元年

金世宗大定十四年

金國子監啓請孔子廟大

成殿聖像冠十二旒服十二章充國公像九章九旒  
檢到唐郊祀錄開元二十七年詔追謚孔子為文宣  
王仍出王者充冕以衣之按周禮王者之服其冕十  
有二旒其服十有二章諸公之繅游九就今文宣王  
冠服已依典故其充國公與鄒國公一體粧塑九章  
服擬遷鄒國公像於宣聖之右與充國公相對准上  
冠服粧塑製文宣王廟樂章迎神奏來寧姑洗宮上都隆化廟  
堂作新神之來格威威具陳穆穆凝凝巍然聖真斯

文伊始群方所親

初獻盥洗靜寧姑洗宮

偉矣素王風猷精至

垂二千年斯文不墜洎辰維良爰修祀事沃盥于庭

嚴禋禮備

陞陞肅寧姑洗宮

魏乎聖師道全德備修明五常

垂教無疆增崇儒宮適追遺風嚴祀申虔登降有容

奠幣和寧姑洗宮

天生聖人賢於堯舜仰之彌高磨而不磷

新廟告成宮墻數仞遣使陳詞斯文復振

降階安寧姑洗宮

稟靈尼丘垂芳闕里生民以來孰如夫子新詞巋然

四方所視酌觴告成祇循典禮

交國公酌獻輯寧姑洗宮

聖師之

門惟顏居上其殆庶幾是宜配饗桓圭衮衣有嚴儀

象載之神祠增光吾黨

鄒國公酌獻恭寧姑洗宮

有周之衰王綱

既墜是生真儒宏才命世言而為經配乎仁義力扶

聖功同垂萬祀

亞終獻成寧姑洗宮

於昭聖能與天立極有承

其流皇仁帝德豈伊立言訓經王國煥我文明典祀

千億

送神來寧姑洗宮

吉蠲為饗孔惠孔時正辭嘉言神之

格思是饗是宜神保聿歸惟時肇祀大平極致

二年御試唱第後二日御殿引按文士詹駉以下一

百三十九人射藝翌日又引文士第五甲及特奏名

一百五十二人其日進士具欄笏入殿起居易戎服

各給箭六弓不限斗力射者莫不振厲自獻多命中  
馬天子甚悅凡三箭中帖為上等正奏第一人轉一  
官與通判餘循一資二箭中為中等減二年磨勘一  
箭中帖及一箭上垛為下一任回不依次注官上  
四甲能全中者取旨第五甲射入上等注黃甲餘升  
名次而已特奏名五等人射藝合格與文學不中者  
亦賜帛

三年三月壬申立任子參選覆試法

四年二月乙亥幸太學祇謁先聖退御敦化堂命國  
子祭酒林光朝講中庸下詔遂幸武學謁武成王廟  
監學官進秩一等諸生推恩賜帛有差○去王雱畫  
像

五年八月戊午增銓試為五場呈試為四場

淳熙六年

金大定十年

九年襲封衍聖公孔摠重修鄆國夫

人殿成党懷英記之

七年二月丙戌復置皇太子宮小學教授○知南康  
軍朱熹乞以泗水侯孔鯉從祀先聖本軍昨因修輯  
軍學照得從祀神位號差舛狀申尚書禮部續準部符

降到見行從事神位號謹已遵依彩畫題寫奉安訖  
熹恭親崇寧元年二月二十五日詔追封孔鯉爲泗  
水侯孔伋爲沂水侯今按本部降到神位名號其泗  
水侯獨未得在從祀之列蓋嘗考之論語伯魚過庭  
親承禮詩之訓先聖又嘗使爲周南召南之學其才  
雖曰不及顏淵然亦不應盡出七十子之下竊意常  
來禮官一時討論偶失編載非固有所取舍升黜于  
其間也熹愚欲望朝廷特賜詳酌將泗水侯列於從  
祀位在七十子之後沂水侯之前庶幾孔門之賢悉  
登祀典有以仰稱崇寧聖詔褒崇之意

職方氏曰文公此狀甚不可缺但所謂崇寧元年  
鯉伋皆封而降到神位名號泗水侯獨未得列從  
祀竊意常來禮官一時討論偶失編載非固有所  
取舍升黜于其門者則文公亦考之不詳也蓋泗  
水沂水之封在崇寧元年者止封于曲阜家廟未  
常通祀于天下至太觀二年九月始詔孔伋從祀  
孔子廟庭而沂水之祀始通于天下若泗水本無  
從祀之詔固非禮官之偶失編載而亦不敢私有



取舍升黜于其間也然文公雖申此狀而終不行  
至度宗咸淳二年而始陞泗水侯從祀又在徽國  
朱文公從祀之後至今嘉靖九年用輔臣張璠議  
復以伯魚配享啓聖公叔梁紇而其得從祀孔廟  
者不能三百年是爲聖嗣者固亦有遇不遇乎

淳熙八年

金大定二十一年金

世宗召五十四代襲封衍聖公孔

摠赴闕下欲留任用力辭請專祀事特授曲阜縣令  
先是延世傳聖佑嗣絕以延澤子宗愿襲封仍知仙  
源子若蒙若虛若愚而長若蒙坐事廢以弟若虛承

襲元符元年若虛卒崇寧二年復以若蒙子端友繼

封建炎初偕叔父傳從高宗南渡居衢傳玠

字錫紹元

興二年襲傳摠

字季紳

紹興二十四年襲傳文遠

字紹先

淳熙四年襲傳萬春

字耆年傳洙

字景清爲五十三代自

端友至洙凡六世于衢爲南襲封而端友之弟端操

金權襲封衍聖公于魯子三瑄璠瑱廢齊阜昌二年

璠襲封衍聖公于魯金熙宗天眷三年贈榮祿大夫

子二極摠皇統二年卒極時年七歲襲封管祀年二

十六卒無嗣金世宗大定三年以弟摠

字元會

襲封管

勾祀終奉直大夫卒年五十三贈光祿大夫初摠四十得子多不育夜夢異人衣冠偉然告曰今此非爾子後丑年庚月丁日所生則真爾子矣當名元措後果如其言元措爲五十一代字夢年十一歲金章宗明昌二年襲封管祀誥曰聖模之大義範百王德祚所傳垂光千祀蓋立道以經世宜承家之有人文宣王五十一代孫孔元措秀阜衍祥清洙流潤芝蘭異粟蔚爲宗黨之英詩禮舊聞蚤服父兄之訓語年雖妙論德已成肆疏世爵之封乃煥身章之數非獨增華於爾族固將振耀於斯文勉嗣前修用光新命特旨令視四品是年章宗行郊禮召赴闕侍祠位在終獻之次三年特旨超授中議大夫仍賜四品勲封誥曰夫子旣沒千八百年後人相承五十一世自近古已公其爵顧階散如彼其卑必也正名難於仍舊是以興百王之曠典峻五品之華資茲以爾有成人之風繼將聖之後當余定格會爾疏封噫廟貌存焉克謹歲時之祀家聲久矣無忘詩禮之傳學有餘師善將終譽承安二年年十七勅兼曲阜縣令仍令世襲

不得差別於是始世襲曲阜令宣宗貞祐二年幸汴  
京趨赴行在所適丁母憂三年起復遙授東平府判  
以便孔氏墳塋祭祀復思土寇未寧若與河北職事  
因而被害恐絕聖人之後因與隨朝職事遂授太常  
博士後累官太常丞通歷三考改遙授泰定軍節度  
使兗州觀察使兼行太常少卿遷光祿大夫改太常  
卿癸巳年歸附元朝于汴梁特取元措還東平仍襲  
封衍聖公奉祀事元世祖至元十九年帝旣平宋疑  
所立或言孔氏子孫寓衢者乃其宗子召孔洙赴朝  
洙避于居曲阜者帝曰寧違榮而不違親真聖人後  
也授國子祭酒提舉浙東道學校事自端友至洙南  
襲封凡六世正嗣絕始罷封焉今居衢者皆傳之後  
也而元措無子元憲宗元年以姪之固庶子湏嗣封  
八年族人以不事儒雅攻之褫其爵罷爲維州尹妾  
任氏上表聞赦自赦麥自麥雖后稷之聖不能化穗  
以成芒渭自渭涇自涇雖大禹之神不能變清而爲  
濁蓋天理有不移之義豈聖門容異姓之人伏念臣  
妾之子孔湏乃五十一代襲封衍聖公孔元措之耳

孫五十二代襲封衍聖公孔之固之冢嗣生長從於  
稚齒提挈至于成人有美維髯遺印在耳雖云庶出  
實係長房爲經版蕩以來遂失過庭之訓以致宗族  
闕議詞訟無休吾道於是乎不光祀事以之而大缺  
肝心頌裂泣涕無從但以名隸寡妻身當圯族抱閨  
門之戚戚望天闕之悠悠所積瀰漫何由控愬必遇  
清明之世能平精衛之冤茲者伏遇上天眷命皇帝  
陛下龍飛九五運應一千始爲儒教大宗師今作中  
原聖天子乾坤浩浩一新汙俗之餘日月煌煌照彼  
復盆之下無淹不振有廢皆興顧惟孔氏之家實係  
生民之望千七百載厥聞愈彰五十三傳其直如矢  
自相浴於百代曾莫紊於一朝至於賢與不賢在人  
品高低之不一嫡仍復嫡見天心付與之分明方當  
朝廷甫定之秋適屬士論向公之日伏惟陛下俯垂  
昭鑒大廓聖源因之以禮義之方加之以師傅之職  
有教固無類也見賢然後用之上可以立皇朝繼絕  
之良規下可以導聖祀無窮之正派雖文昭武穆不  
幸有幽厲之衰桀丹朱商均未害爲堯舜之後自惟

升定世家集卷一  
七  
縷蟻輒犯雷霆臣妾不勝惶懼戰慄之極匍匐待死  
闕下無子自端操至湏凡六世而北襲封嗣絕而若

愚生端立立生琥字文通子二元孝元用孝生之厚厚

生浣浣生思晦晦生克堅為五五代云貞祐二年

元措從宣宗于汴擬元元用攝祀事及宋克平山東

寶慶元年權襲封衍聖公仙源令二年改濟州通判

元太師木華里統兵至承制封拜權授襲封衍聖公

世襲曲阜令給降衍聖公印乙酉太師征益都以元

用偕行世襲曲阜令生之全全生治元貞元年授中

議大夫襲封衍聖公子思誠罷封

淳熙九年金世宗大定二十二年金主遣兗州節度使孫康致祭

曰國家禮崇儒術道尊聖師闕里廟貌予以新之雅

樂具舉法服彰之庶幾鑒格永集繁禧尚饗

三月戊子宋詔四川類試自今十六人取一人癸巳

復銓試舊法罷試雜文○五月丙寅增皇太子宮小

學教授一員

十一年進士廷試不許見燭其納卷最後者降黜之

舊制廷試至暮許賜燭然殿深易闇日晏已燭出矣

凡賜燭正奏名降一甲第五甲降充本甲末名特奏名降一等第五等與設助教凡試藝于省闈及國子監兩浙轉運司者皆禁燭其他郡國率達旦乃出○十月太常博士倪思言舉人輕視史學今之論史者獨取漢唐混一之事三國六朝五代爲非盛世而耻譚之然其進取之得失守禦之當否籌策之疎密區處兵民之方形勢成敗之迹俾加討究有補國家請諭春官凡課試命題雜出諸史無所拘忌考覈之際稍以論策爲重毋止以初場定去留從之

十四年時朱熹嘗欲罷詩賦而分諸經子史時務之年其議曰古者大學之教以格物致知爲先而考校之法又以九年知類通達強立不返爲大成若合所當讀之書而分年使之各以三年而共通其三四之一凡易詩書爲一科而子年午年試之周禮儀禮二戴記爲一科而卯年試之春秋及三傳爲一科而酉年試之義各二道諸經皆兼大學論語中庸孟子義一道論則分諸子爲四科而分年以附焉諸史則左傳國語史記兩漢爲一科三國晉書南北史爲一科

新舊唐書五代史爲一科時務律曆地理爲一科以  
次分年如經子之法試策各二道又使治經者各守  
家法答義者必通貫經文條舉衆說而斷以己意有  
司命題必依章句如是則士無不通之經史而皆可  
用於世矣議雖未上天下誦之

宋光宗紹熙元年仍按射不合格者罷賜帛

紹熙二年

金章宗明昌元年

有異人履玄白烏瞻拜先聖於

廟門外竚立石上甚有異色旣去其石跡存焉有文  
曰仙人脚次年有旨修廟謂侍臣曰昔夫子立教于

洙泗有天下者所當取法今遺祠久不葺且甚隘陋

不稱聖師居其大作新之凡爲殿堂廊廡門亭齋厨

盤舍三百六十餘楹翰林學士知制誥党懷英記之

紹熙五年

金明昌四年

親釋奠先聖諭旨宣徽院曰朕

以宣聖萬世帝王之師恐汝等未諭可備拜裊朕將

拜焉更定樂章

迎神來寧姑洗宮

有功者祀德厚流光猗歟

將聖三綱五常百代之師久而愈芳靈宮對越神其

鑒享

盥洗淨寧姑洗宮

楚楚祀儀听徵奠綴爰清其持對玄

校悅非特之清精誠是况神之來思式欽嘉降

升殿南呂

肅衣冠襲封玄王之宗春秋陳祀玄王之宮清洙或

涸東山或童此封此祀承承無窮奠幣姑洗溥寧仰惟聖猷

寵賜尊顯宿燎設縣展誠是奠旅幣申申於粢洗腴

崇報孔明不墜敬典酌獻姑洗德寧巍巍堂堂道德孰儷屈

於一時信於萬世王號尊宗公封相繼涓辰之良潔

嚴以祭酌獻堯國公宮調同前好學潛心簞瓢樂內具體而微

我進人退洙泗之鄉神之所在其從聖師廟食作配

酌獻鄒國公宮調同前醇乎其醇優入聖域祖述唐虞力排楊

墨思濟斯民果行其德祀為上公宜茲配食亞終酌獻先聖

宮調同前法施于人修經式誨如鏡開明如聲破曠棲遲

衰周光華昭代儼然南面門人列配送神姑洗歸寧邊豆有

嘉威儀孔惠三獻備舉四方所視神保是饗永光闕

里神之聿歸貽穀孫子乃遣太常樂工教孔氏子弟

各執其藝以備祭祀當年有司奏定衍聖公初獻法

服依四品用六梁冠終獻七品用三梁冠登歌用二

十五人將太常寺富餘鐘磬笙等等修整降下令本

廟親族子弟及學生等閱習是年寧宗受禪○十月

戊戌復許武舉人試換文資戊寅詔兩省臺諫侍從



各舉宗室有文學者器識者二人

宋寧宗慶元間定祀令文宣王爲中祀諸祀事應排  
辦者所屬前一日檢舉諸祀獻官以州縣長吏以次  
官克非實有疾故不得輒委他官行禮

四年以經義多用套類父子兄弟相授致天下士子  
不務實學遂命有司六經出題各於本經摘出兩段  
文意相類者合爲一題以杜挾冊讐僞之計

五年五月壬子詔諸路州學置武士齋選官按其武  
藝

寧宗嘉泰三年春正月戊戌幸太學謁大成殿御化  
原堂命國子祭酒李寅仲講尚書周官篇遂幸武學  
謁武成殿監學官進秩一級諸生推恩賜帛有差○  
四月辛酉詔宰執臺諫子孫毋就試

四年二月丁酉置莊文太子府小學教授

寧宗開禧二年春正月乙未增太學內舍生爲百二  
十人○以舉人姦弊滋多命諸道漕司州府軍監凡  
發解舉人合格試卷姓名類申禮部候省試中牒發  
御史臺同禮部長貳參對字畫關御藥院內侍照應

廷試字畫不同者別榜駁放舊制秋貢春試皆置別頭場以待舉人之避親者自總麻以上親及大功以上婚姻之家皆牒送惟臨軒親試謂之天子門生雖父兄爲考官亦不避○七月乙巳置沂王府小學教授

寧宗嘉定元年

金章宗泰和八年八月二十七日

以先聖降誕之辰

前期一日率闔族敬詣尼山廟祭奠日方午刻俄聆殿上當空有樂振作皆金石絲竹之聲凡在一舍間皆聞之駭然○宋始因議臣有請命朝官有親屬赴廷對者免差充考校

二年二月丁亥罷法科試經義復六場舊法

四年四月國子司業劉燭奏乞開僞學禁刊朱熹四書集註于太學

嘉定七年

金宣宗貞佑二年正月二十四日

北虜犯本廟殿堂廡廊

灰燼什伍植檜三株亦遭厄數適有四十九世孫廟學正瑋洎族人避於其間俄有五色雲覆其上雲中羣鶴翔鳴良久而去田夫野老無不見之先聖手植三檜兩株在贊德殿前高六丈餘圍一丈四尺其文

左者左紐右者右紐一株在杏壇東南隅高五丈餘  
圍一丈三尺其枝蟠屈如龍形世謂之再生檜至晉  
永嘉三年枯死隋義寧元年復生唐乾封二年又枯  
死宋康定元年復生至是歲甲戌被焚收煨燼之餘  
携至闕下至大甲申內省知事除開封府李世能命  
工刻爲先聖容暨從祀賢像召衍聖公孔元措瞻仰  
因述其事○八月癸卯宋復建宗學置博士諭各一  
人弟子員百人

嘉定十二年命國子牒試禁假託宗枝遷就服屬已  
者必真于罰

嘉定十五年秘書郎何澹言有司以題強裂句讀專  
務斷章離絕旨意破碎經文望令革去舊習使士子  
考注疏而辨異同明綱領而識體要從之

嘉定十七年理宗嗣位九月己卯詔以先聖四十九  
代孫行可爲迪功郎授判司簿尉

宋理宗寶慶二年二月詔朱熹集註大學論語孟子  
中庸發揮聖賢蘊奧有補治道朕勵志講學緬懷典  
刑可特贈太師封信國公○六月壬寅詔以孔子五

十二代孫萬春襲封衍聖公○時舉人凡五弊傳義  
換卷易號卷子出外謄錄滅裂左諫議大夫朱端常  
奏防戢策允之試院監大門中門官乃一院襟喉差  
有風力者入試日一切不許傳遞士人暮夜納卷易  
散失令封彌官躬親封鐫卷匱士人親書幕曆投匱  
中俟舉人盡出然後啓封分類抄上卽付謄錄所明  
旦申逐場名數于御史臺檢核其撰號法上一字許  
同下二字各異以杜訛易謄錄選擇書手克不許代  
名具姓名字樣申院覆寫檢實傳義置窠人委臨安

府嚴捕考官用情任意許臺諫風聞彈奏寘重典出  
官錢立賞格許告懷挾傳題傳稟全身代名人試人  
理宗紹定元年有言舉人程文雷同或一字不差其  
弊有二一則考官受賂或授暗記或與全篇一家分  
傳謄寫一則老儒賣文場屋一人傳十十人傳百考  
官不暇參稽於是命禮部戒飭前申號三日監試會  
聚考官將合取卷參驗互考稍涉雷同卽與黜落或  
仍前弊以致覺察則考官監試一例黜退初省試奉  
勅差知貢舉一員同知二員內差臺諫官一員參詳

官若干員內差監察御史一員俾會聚考校微寓彈  
壓糾察之意韓侂胄用事將鈐制十人遂於三知舉  
外別差同知一員以諫官爲之專董試事不復干預  
考校參詳官亦不差察官於是約束峻切氣燄薰灼  
嘉泰間更名監試其失愈甚製簿曆嚴立程限至是  
復舊制

三年御製贊宣聖曰聖哉尼父秉德在躬歷聘列國  
道大莫容六藝旣作文教聿崇古今日月萬代所宗  
○顏子曰學貫孔門德行科首聞一知十若虛實有

樂道簞瓢不易所守步趨聖人瞠若其後○子思曰  
閑居請庸世業克昌可離非道孜孜立行發揮中庸  
體固有常入德樞要治道權衡○孟子曰道術分裂  
諸子爲書旣極而合篤生真儒詆訶楊墨皇極是扶  
較功論德三聖之徒○十二月庚申詔錄用孔子四  
十九代孫燦補官

四年命官鎖廳及避親舉人自紹熙分場各試寒士  
憚之緣避親人七人取一其額太窄咸以爲窘而朝  
士之被差爲大院考官者恐多妨其親亦不願差寒

士於鄉舉千百取一之中得預秋薦以數千里之遠  
辛勤赴省而省闈差官乃當相避遂有隱身匿名不  
認親戚以求免者憤懣憂沮狼狽旅邸者彼此交怨  
相視爲讎至是言者謂除大院收試外以漕舉及待  
補國子生到省者與避親人同試於別院亦將不下  
數百人數旣多其額自寬寒士可不怨其親戚朝  
士可不憚於被差從之旣而以諸路轉運司牒試多  
營求僞冒之弊命止許牒滿里親子孫及門客召見  
任官二員委保與有官礙格人各處收試五十八人取  
放一人合牒親子孫別項隔截收試不及五十人亦  
取一人凡涉詐冒並坐牒官保官

元國初燕京始平宣撫王揖請以金樞密院爲宣聖  
廟

理宗端平元年

元太宗六年

侍御史李鳴復等條例建言

謂臺諫充知舉參詳旣留心考校不能檢柅姦弊欲  
乞仍舊差臺諫爲監試懷挾之禁不嚴皆爲具文欲  
懸賞募人告捉精選強敏巡按官及八廂等人謹切  
巡邏有犯則鐫黜官員考校不精多緣點檢官不時

供卷及開院日迫試官沓至知舉倉卒不及遂致遺才欲乞試院隨房置曆程督點檢官書所供卷數日逐押曆考校試卷不遵舊式務從檢便點檢參詳穿聯爲一欲乞必如舊制三場試卷分送三點檢三參詳三知舉庶得詳審試官互考經賦未必精熟欲乞前期納度試卷經賦凡若干則各差試官若干不至偏重並從之○元設國子總教及提舉官命貴臣子弟入學受業

二年正月甲寅詔議胡瑗孫明復邵雍歐陽修周敦頤司馬光蘇軾張載程顥程頤等十人從祀孔子廟庭升孔伋十哲

端平三年

元太宗八年

三月元復修孔子廟及司天臺

理宗嘉熙元年

元太宗九年

宋罷諸牒試應郎官以上監

司守倅之門客及姑姨同宗之子弟與游士之不便於歸鄉就試者並混同試于轉運司各從所寓縣給據徑赴司納卷一如鄉舉之法家狀各書本貫不問其所從來而定其名寓試以四十人爲額就試如滿五十人則臨時取旨增放又罷諸路轉運司及諸州

軍府所取待補國子生自明年並許赴國子監混試  
以士子數多命於禮部及臨安轉運司兩試院外紹  
興安吉各置一院從朝廷差官前詣同日引試分各  
路士人就試馬同在京不許見燭○六月丙午詔建  
內小學擇宗子十歲以下資質美者二三人置師教  
之

元太宗始定中原卽議建學設科取士在潛行釋奠  
禮平金初是歲丁酉首詔孔元措襲封衍聖公復孔  
顏孟三氏子孫世世無所與增給廟戶皆復其家是

歲曆日銀諸路以其半益都東平以其全給修宣聖

廟尋詔元措

元史本紀措作楷

括金人禮樂官師及前代典

冊鐘磬等器以數來上仍命于胄子閱習禮樂

以備時用又詔諸路設學遣官分道程式儒業祀孔  
子于日月山

九年秋八月元下詔命斷事官朮忽解與山西東路  
課稅所長官劉中歷諸路考試以論及經義詞賦分  
爲三科作三日程專治一科能兼者聽但以不失文  
義爲中選其中選者復其賦役令與各處長官同署



公事得東平楊英等凡若干人皆一時名士而當世或以爲非便事復中止○廟戶奉上絲綿顏色稅石軍役大小差發並行蠲免○給孔氏一十五家灑掃廟戶依舊一百石

嘉熙二年臣僚言國子牒試之弊冒濫滋甚在朝之臣有強認踈遠之親爲近屬者有各私親故換易而互牒者有爲權勢所軋人情所牽應命而泛及者有自揆子弟非才牒同姓之雋茂利其假手者有文藝素乏執格法以求牒轉售同姓以謀利者今後令牒

官各從本職長官具朝典狀保明先期取本官知委狀仍立賞格許人指實陳首冒牒之官按劾鐫秩受牒之人駁放殿舉保官亦與連坐專令御史臺覺察都省勘會類申門客滿里子孫仍前漕試六十人取一較之他處雖甚優而取無定額士有疑心就試者少宜令額寬而試者衆塗一而取之精遂依前例放行寓試以四十名爲定額仍前待補其類申門客滿里子孫附試○下朱熹通鑑綱目國子監并進經筵宋理宗淳祐元年正月追封周敦頤汝南伯張載郾

伯程顥河南伯程頤伊南伯信國公朱熹爲徽國公  
並從祀孔子廟庭詔曰朕惟孔子之道自孟軻後不  
得其傳至我朝周敦頤張載程顥程頤真見力踐深  
探聖域千載絕學始有指歸中興以來又得朱熹精  
思明辨折中會融中庸大學論孟之書本末洞徹孔  
子之道益以大明于世朕每觀五臣論著啓沃良多  
今視學有日宜令學官列諸從祀以示朕崇儒之意  
黜王安石從祀帝謁孔子遂臨太學御崇化堂命祭  
酒曹夔講禮記大學篇以紹定三年所製伏羲堯舜  
禹湯文武周孔顏曾思孟道統十三贊就賜國子監  
宣示諸生復親書朱熹白鹿洞學視賜焉

職方氏曰或問孟子以神宗元豐六年始封鄒公  
七年因晉州陸教授長愈之請始與顏子並配王  
臨川卽于徽宗崇寧三年以荆公配享位次孟軻  
五年置算學亦究鄒荆三配至政和三年加封舒  
王復封其子雱臨川伯從祀廟庭孝宗隆興元年  
建寧布衣魏掞之請廢安石父子勿祀而追爵二  
程從祀不報淳熙四年去雱畫像理宗寶慶三年

封朱子信國公端平二年詔議胡瑗孫明復邵雍  
歐陽脩周敦頤司馬光蘇軾張載二程十人從祀  
淳祐元年封周張二程爲伯改朱子徽國公竝從  
祀而黜王安石至今遂爲定論其折衷可得聞乎  
曰是未易言也夫小有才如雩他無論卽臬韓琦  
富弼頭于市則法行矣一語已足以死何言俎豆  
哉若王荊公之匡時致主亦可謂苦心而其相業  
學術亦未可謂盡非也彼深慨宋失之弱欲強之  
而用失之靡欲生而節之以要于豐而用其強爲  
取幽燕計其素所蓄積也信有如劉定之所論也  
今試就其新法言之夫以其經義取士也以保甲  
繫民也以雇役杜累也至今經國者有能出其範  
圍乎其法是也特所用以行法者非也故曰有治  
人無治法而法何病焉然相之用人難矣荊公拘  
而不虛則失之惠卿溫公拘而不透則失之蔡京  
一京爲卞兄卞爲王壻光秉政復差役法爲期五日  
同列病太迫京爲開封如期改畿縣雇役無一違  
者光喜曰使人人奉法如君何不可行之有而京

升定世家集卷之四  
從此柄用矣及入權戶部時章惇復變役法置司  
講讀京曰取熙寧成法行之爾何以講爲雇役遂  
定京之反覆可畏不啻惠卿要之信用京者誰而  
以亂宋罪荆公也哉大都宋以仁厚立國以寬恕  
恤士每建一利興一事紛紛不究其歸而各逞其  
臆意曰卽得罪不過遠竄耳以故議論多而成功  
寡卽如蘇長公當荆公時則忤荆公及溫公時又  
忤溫公嘗見荆公于長公未嘗不相知卽其妹夫  
秦少游之才雋長公一言而荆公卽信而用之何

嘗不開誠布公程明道謂新法之禍未必皆王安  
石之過皆吾黨激成之而安石厲色待言者顯徐  
曰天下事非一家私議願平氣以聽安石爲之媿  
屈明道嘗爲安石條例司官本與之善旣不合猶  
敬其忠信不深怒惟伊川意見不同撰明道行狀  
諱之總之荆公自負讀書多見理到立身潔視天  
下士皆不足以當我者病在高而不下耳此大學  
以平天下之相必歸于無他技而後寔能容有技  
彥聖也若其三經義字說亦未爲無理夫字之設

原以象事理之義而傳天地之神故讀書患不識  
字識字而于義理思過半矣特其杜撰偏說有不  
可不是正者而三經義之粹然出于正者自不可  
易朱子四書集註與詩經集傳所謂王氏曰者皆  
荆公說也朱子集中禱著尚書如洛誥武成皆取  
荆公說嘗曰荆公六藝學精絕處迥不可及而又  
謂王介甫以節行文章高一世朱子豈阿私所好  
者哉黃東發嘗言荆公誤國東坡忠讜先生蓋所  
屢言及汪玉山主張蘇學太過先生則又定以荆

公爲賢意可識矣惟揚龜山以蔡京薦起家爲祭  
酒遂疏安石著爲邪說以塗學者耳目乞奪配享  
而中丞陳過庭言五經義微諸家異見以所是者  
爲正所否者爲邪此一偏之大失也頃者指蘇軾  
爲邪學加禁甚切今已弛其禁許采其長實爲通  
論而祭酒楊時矯枉太過復詆王氏以爲邪說非  
也諸生習用王學聞時之言羣起而詆訾之時引  
避不出齋生始散詔罷時祭酒降安石從祀廟庭  
則安石之學得行於當時者果盡其壻蔡卞力能

奪天下耳目而盡塗之哉故坐客有問龜山立朝  
事朱子曰當時國勢已如此虜初退後便須急急  
理會如救焚拯溺諸公今日論蔡京明日論王黼  
當時奸黨各已行遣了只管理會不休擔閣了日  
子如吳元忠李伯紀向來亦是蔡京引用免不得  
畧遮庇只管喫人議論龜山亦被孫覲輩窘擾又  
曰他做人也苟且是時未免祿仕故胡亂就之苟  
可以少行其道龜山之心也然來得已不是及至  
又無可爲者只是說沒緊要事當此之時苟有大  
力量咄嗟間真能轉移天下之事來得也不枉旣  
不能然又只是隨衆鶻突及欽宗卽位爲諫議大  
夫因爭配享事爲孫仲益所攻孫言楊時與蔡京  
諸子遊今衆議攻京而楊時曰慎毋攻居安云云  
龜山遂罷龜山一生得力惟是罷安石配享而陳  
中丞以爲矯枉太過朱文公以爲沒緊要事則其  
說可知矣世輒舉東坡波爲水皮則滑乃水骨與  
三鹿非粗三牛非奔爲字說笑柄夫波行水面豈  
非水皮而滑屬本體便是水骨詩固稱鹿奔而地

有名奔牛且牛體大而蠢鹿固不若鹿角長而枝  
牛亦不若而牛有日行三百里者粗奚不在鹿而  
奔奚不在牛乎惟是以春秋爲腐爛朝報而經筵  
不以進講爲非然朱子註經獨不及春秋胡安國  
春秋傳成朱子曰直是夫子親出來說方敢信故  
知朱子所以不敢輕言春秋則介甫不進講之意  
亦有可原者矣我

朝經筵進講亦惟四書書經通鑑而不及春秋卽禮  
記進講必自

聖上特達高明而始有此盛舉則亦豈王荆公之力  
量能束縛今日朝士儒紳乎亦可以悟矣

臣僚言旣復諸路漕試合國子試兩項科舉及免舉  
人不下千數宜復撥漕舉胃舉同避親人並就別院  
引試使大院無卷冗之患小院無額容之弊從之

十二年廣南西路言所部二十五郡科選於春官僅  
一二蓋山林質樸不能與中土士子同工請援兩淮  
荆襄例別考朝廷從其請自是廣南分東西兩路

理宗寶祐二年

元憲宗四年

元世祖在潛邸特命脩理孔

廟殿廷及卽位賜以玉輦俾永爲祭器○置宣聖廟于燕京自上都大都及天下立廟學脩葺曲阜林廟理宗寶祐四年二月丙子詔襲封衍聖公孫孔洙添差通判吉州不釐務○命在朝之臣除宰執侍從臺諫外自卿監郎官以下至釐務官各具三代宗支圖三本結立罪狀申尚書省御史臺及禮部所屬各置簿籍存留照應遇屬子孫登科發解入學奏補事故並具申入鑿後由外任登朝亦於供職目後具圖籍記如上法遇胄試之年照朝廷限員榜內牒能應舉人就試○五月甲午先聖五十代孫孔元龍賜廸功

郎授初品官

理宗景定二年

元世祖中統二年

正月丁丑宋詔皇太子謁

孔子于太學乙酉追封張栻華陽伯呂祖謙開封伯從祀孔子廟庭從太子謁還請也皇太子奏臣恭奉聖旨擇用正月十五日令臣謁拜先聖文宣王于太學臣仰體聖心祇承嚴訓區區愚衷因而感發焉蓋先聖之道至我朝盛時運際文明真儒迭起而後有以續夫孟氏之傳然其時諸說並駕未知統一迨乾



淳間文公臣朱熹與宣公臣張栻成公臣呂祖謙志  
同道合切思講磨如義利之辨如近思錄之書擇精  
語詳開牖後學誠有功於聖門中間邪說又幾晦蝕  
陛下聖德奮興罷黜詖邪表章正學然後人心一聖  
道大明天下學士得泐淵源而邇洙泗實萬世無疆  
之休熹等三臣嘗被詔追褒特嘉隆惠盛典兼準御  
筆秩熹于從祀如栻如祖謙竊謂宜用升祀例以稱  
明詔臣愚欲望睿旨特以臣栻臣祖謙列于從祀之  
列以益昭聖明崇儒重道之盛美詔從之○胄子牒

試員宰執牒總麻以上親增作四十人侍從臺諫給  
事中舍人小功以上親增作二十七人卿監郎官秘  
書省官四總領小功以上親增作二十人寺監丞簿  
學官二令大功以上親增作十五人六院四轄省部  
門史館校勘檢閱大功以上親增作十人臨安府通  
判牒大功以上親增作八人餘應牒親子孫者一仍

舊制

四月太醫院使王猷言醫學久廢後進無所師

遣副使

王安石後以金牌往諸路設立醫學其生員

擬免

本身檢醫差占等役俟其學有所成每月試以

疑難

視其所對六月元詔宣聖廟及管內書院有司

優劣

量加勸懲

歲祀致祭月朔釋奠禁諸官員使臣軍馬毋得侵擾  
褻瀆違者加罪○八月丁酉元命開平守臣釋奠于  
宣聖廟○始命置諸路學校官凡諸生進脩者嚴加  
訓誨務使成材以備選用○九月戊辰元大司農姚  
樞請以儒人楊庸教孔顏孟三氏子孫東平府詳議  
官王鏞兼充禮樂提舉詔以庸為教授以鏞特兼大  
常少卿

景定三年

元中統三年

春正月癸亥元修宣聖廟成

景定五年

元世祖至元初年

命丞相史天澤條具當行大事

嘗及科舉而未果行

宋度宗初以雷同假手之弊多由於州郡試院繼燭  
達旦或至次日辰巳猶未出院其所以間日者不惟  
止可以惠不能文之人適足以害能文之士遂一遵

舊制連試三日

咸淳三年

元世祖至元四年

正月戊申帝幸太學謁孔子行

舍萊禮令禮官學官議增曾子子思侑食升可十哲  
者列邵雍司馬光從祀雍封新安伯禮部尚書陳宗  
禮國子祭酒陳宜中進讀中庸己酉執經官宗禮講

經官宜中各進一秩宜中賜紫章服太學武學宗學  
國子學宗正等官若醫官監書庫門庖等各進一秩  
諸齋長諭及起居學正推恩有差是月十五日御筆  
邵雍天挺人豪英雄蓋世司馬光有德有言有功有  
烈朱熹贊之與周程張俱雍述經世書發先天奧旨  
而內聖外王之學實關吾道光著通鑑貽後世治法  
而真履實踐之每爲時儒宗彛豈前代諸儒或以章  
句文詞得祠于學者比朕將臨辟雍因思朱熹所贊  
已祀其四而尚遺雍光非缺歟其令學官列諸從祀

以示崇獎又御筆惟孔子獨稱顏回好學固非三千  
之徒所同也而其學不傳得聖傳者獨曾子傳子思  
子思傳孟子忠恕兩語深契一貫之旨中庸一篇丕  
闡前世之蘊而孔子之道益著向非顏曾思孟相繼  
演澤著書垂訓中更管商揚墨佛老幾何其不遂衣  
哉今大成惟顏孟侑食曾思不預尚爲闕典先皇帝  
迹道統之傳自伏羲以來著十三贊孔子而下顏曾  
思孟昭昭具在其非以遺我後人乎其令禮官學官  
議可升曾思侑食併議可升十哲者以聞是年二月

禮部太常寺國子監三學聚議子張實居從祀七十  
二賢之首以序而升遷曰子張爲當首依由是升魯  
參封邾國公孔伋封沂國公配食大成加閔損費冉  
耕鄆冉雍薛宰予齊端木賜黎冉求徐仲由衛言偃  
吳卜商魏俱國公改潁川侯顓孫師爲陳國公升十  
哲遣官致祭于至聖文宣王惟王金聲王振集厥大  
成有道立教垂憲萬世茲率舊章謹以制幣牲齊粢  
盛庶品式陳明薦以先師兗國公邾國公沂國公鄒  
國公配尚饗遣官致祭于先師兗國公惟公有學術  
業未達一間賢冠四科實惟亞聖茲率舊章釋奠于  
至聖文宣王謹以制幣牲齊粢盛庶品式陳明薦從  
祀配神尚饗先師邾國公惟公以魯而得以唯而悟  
傳得其宗一貫忠恕先師沂國公惟公中庸一書開  
示蘊奧先師傳之有功聖道先師邾國公惟公知言  
知德亦克允蹈攘斥異端以承三聖茲率以○癸卯  
元勅修曲阜宣聖廟

職方氏曰按闕里志以此祭文爲崇寧五年徽宗  
遣官致祭者而詳玩所配先師兗邾沂鄒四公則

升定世家集卷  
徽宗時未嘗有此爵號也蓋徽宗于崇寧封伋爲沂水侯于大觀詔伋從祀而魯之邾國公伋之沂國公配享皆度宗咸淳三年事也則此五祭文仍宜載此以刊闕里志之誤

四月陞泗水侯孔鯉從祀從侍左郎官宋遇所奏也  
○配享位序兗國公邾國公沂國公鄒國公居正位之東面西向北爲配位費公閔損薛公冉雍黎公端木賜衛公仲由魏公卜商居殿上東面西向北上鄆公冉耕齊公宰子徐公冉求吳公言偃陳公顓孫師

居殿上西面東向北上爲從祀東廡金鄉侯澹臺滅明任城侯原憲汝陽侯南宮适萊蕪侯曾點須昌侯商瞿平輿侯漆雕開睢陽侯司馬耕平陰侯有若東阿侯巫馬施陽穀侯顏辛上蔡侯曹卹枝江侯公孫龍馮翊侯秦祖雷澤侯顏高上邽侯壤駟赤成邑侯石作蜀鉅平侯公夏首膠東侯后處濟陽侯奚容點富陽侯顏祖滄陽侯句井疆郵城侯秦商即墨侯公祖句茲武城侯縣成汎源侯燕伋宛句侯顏之僕建成侯樂欵堂邑侯顏何林慮侯狄墨鄆城侯孔忠徐

城侯公西點臨濮侯施之常華亭侯秦非文登侯申  
振濟險侯顏增泗水侯孔鯉蘭陵伯荀況睢陵伯穀  
梁赤萊蕪伯高堂生樂壽伯毛萇彭城伯劉向中牟  
伯鄭衆緱氏伯杜子春良鄉伯盧植滎陽伯服虔司  
空王肅司徒杜預昌黎伯韓愈河南伯程顥新安伯  
邵雍溫國公司馬光華陽伯張栻凡五十二人並西  
向西廡單父侯宓不齊高密侯公治長北海侯公皙  
哀曲阜侯顏無繇共城侯高柴壽張侯公伯寮益都  
侯樊須鉅野侯公西赤千乘侯梁鱣臨沂侯冉孺沐  
陽侯伯虔諸城侯冉季濩陽侯漆雕哆高苑侯漆雕  
徒父鄒平侯商澤當陽侯任不齊牟平侯公良孺新  
息侯秦冉梁父侯公肩定聊城侯鄒單祁鄉侯罕父  
黑溜川侯申黨厭次侯榮旂南華侯左人郢胸山侯  
鄭國樂平侯原元胙城侯廉潔博平侯叔仲會高堂  
侯邾巽臨朐侯公西輿如內黃侯遽瑗長山侯林放  
南頓侯陳亢陽平侯張博昌侯步叔乘中都伯左丘  
明臨淄伯公羊高乘氏伯伏勝考城伯戴聖曲阜伯  
孔安國成都伯楊雄岐陽伯賈逵扶風伯馬融高密

伯鄭玄任城伯何休偃師伯王弼新野伯范甯汝南  
伯周敦頤伊陽伯程頤郟伯張載徽國公朱熹開封  
伯呂祖謙凡五十二人並東向

職方氏曰按顏子之配自漢高始顏子之配通于  
天下自唐太宗始子思之封侯而從祀自宋徽宗  
始孟軻之封公而與回同配自宋神宗始陸曾子  
子思爲公而與顏孟稱四配并列伯魚于從祀自  
宋度宗始改子張爲公而躋于十哲亦自度宗始  
或曰子張之堂堂未仁夫子旣難之又過之即君

家貞白公亦謂宜進有若而今甲申間南部郎唐  
君伯元亦謂宜進有若而退冉求乃宋世以師當  
之何也職方氏曰先子之欲進有若也謂子夏子  
游子張所以聖事者也謂魯論曾子有子皆以子  
稱者也然二子之稱雖同于曾子而三賢之事卒  
卻于曾子且有子之記記于有子之門人非聖人  
意也聖人固曰吾亦有四友矣自吾得師而前有  
光後有輝以爲先後之臣與回由賜並稱而四今  
回旣進于配而由賜本列于哲則師之以四友而

躋十哲也竊以爲聖意當不出此也若求則唐君亦以與陳蔡難故原之矣

九月翰林學士承旨王鶚等請行選舉法遠述周制次及漢隋唐取士科目近舉遼金選舉用人與本朝太宗得人之効以爲貢舉法廢士無入仕之階或習刀筆以爲吏胥或執僕役以事官僚或作技巧販鬻以爲工匠商賈以今論之惟科舉取士最爲切務矧先朝故典尤宜追述奏上帝曰此良法也其行之中書左三部與翰林學士議立程式又請依前代立國學選蒙古人諸職官子孫百人專命師儒教習經書俟其藝成然後試用庶幾勳舊之家人材輩出以備超擢

咸淳五年

元至元六年

秋七月置諸路蒙古字學十二月

中書省定學制頒行之命諸路府官子弟入學上路二人下路二人府一人州一人餘民間子弟上路三十人下路二十五人願充生徒者與免一身雜役以譯寫通鑑節要頒行各路俾肄習之

咸淳六年

元至元七年

夏四月壬午設諸路蒙古字學教



授

咸淳七年

元至元八年

春正月始下詔立京師蒙古國子

學教習諸生於隨朝蒙古漢人百官及怯薛百官員  
選子弟俊秀者入學然未有員數乞以通鑑節要用  
蒙古古語言譯教之俟生員習學成效出題試問觀其  
所對精通者量授官職○三月乙酉元設國子學增  
置司業博士助教各一員選隨朝百官近侍蒙古漢  
人子孫及俊秀者充生徒○戊子宋詔臨江軍宣聖  
四十七代孫延之子孫與放國子監試

咸淳九年

元至元十年

元中書省判御史中丞兼領侍儀

司呈至聖文宣王用王者禮樂御王者衣冠南面當  
坐天子供祠其於萬世之絕尊千載之通祀者莫如  
吾夫子也切見外路官員提學教授每遇春秋二丁  
不變常服以供執事於禮未宜及照得漢唐以來祭  
文廟享社稷無非具公服執手板且鄉人儼猶朝服  
而立於階先聖先師安得不備禮儀者乎令以往擬  
令執事官員各依品序穿着公服陪位諸儒亦合衣  
襴衫戴唐巾行釋奠之禮○元王惲狀言伏見歷代

尊禮孔聖世有襲封以奉祀事會驗國朝自壬辰年  
間欽奉聖旨於南京取到五十一代孫孔元措赴闕  
令襲封於魯自元措之後嗣襲遂闕歲時主祀止令  
曲阜令治承權祀事甚非大宗主祭之義我國家尊  
師重道焜耀百代三教九流莫不崇奉豈惜一人爵  
祿而不議奉建蓋未有舉行者合無聞奏明考族譜  
令宗親推其賢而有文者襲其封爵俾奉祀事以明  
天下風俗之本寔聖代殊常之盛典也於是定襲封  
之嗣復除孔氏一人尹曲阜縣闕里祠宇燬于金季  
之亂奎文閣大中門皆不存山東右轄嚴忠濟以請  
臺頒曆錢佐營繕歲戊申始復鄆國後寢以寓先聖  
顏孟十哲像至元丁卯衍聖公治尹曲阜主祀事起  
奎文杏壇齋廳黌舍○王惲又狀言伏見國朝尊師  
重道德及後裔其孔顏孟子孫故往者特設教官使  
之養育比年以來不聞一人有學業聞望者雖親炙  
祖庭其淵源聞見終是寡陋今後有無選三家德性  
頗明俊者使入京師國學令學士等官教育庶幾有  
成以昭先世之德

宋時諸州郡以鄉貢終場人衆而元額少自此年爲始視終場人多寡每二百人取放一名以士子數多增參詳官二員點檢試卷官六員又以臣僚條上科場之弊以大院別院參詳官點檢試卷官兼考雷同義監試兼專一詳定雷同試卷不預考校遂罷簾外點檢雷同官國子監解試雷同官亦罷

咸淳十年

元至元十一年

少帝嗣位九月辛巳覆試文武舉

士人壬午覆試文武舉士人○十一月乙酉覆試特奏名士人新進士舊有期集渡江後置局于禮部貢

院特旨賜餐錢唱第之三日赴馬上二人得自擇同升之彥分職有差朝謝後拜黃甲其儀設褥于堂上東西相向皆再拜拜已擇榜中年長者一人狀元拜之復擇最少者一人拜狀元所以侈寵靈重年好明長少也○十一月元裕宗在東宮時省臣復啓謂去年奉旨行科舉今將翰林老臣等所議程式以聞奉令旨准蒙古進士科及漢人進士科參酌時宜以立制度事未施行

宋少帝德祐元年八月戊申試大學上舍生

德祐二年

元至元三年

元授提舉學校官六品印遂改爲

大都路學署曰提舉學校所○三月戊寅敕諸路儒戶通文學者三千八百九十並免其徭役其富實以儒戶避役者爲民貧乏者五百戶隸太常寺○五月壬寅宋三學生四十六人至京師○六月己巳以孔子五十三世孫曲阜縣尹孔治兼權主祀事

元至元元年冬十月季用和禮霍孫言於楊州隆興鄂州泉州四省置蒙古提舉學校官各二員

十九年夏四月命雲南諸路皆建學以祀先聖○定擬路府設教授以國字在諸字之右府州教授一任准從八品再歷路教授一任准正八品任回本等遷轉

二十一年齊魯未平命平章政事察罕帖木爾德平之八月搗東平降渠冠田豐斬首六萬級悉定魯地遣都事尹師彥奉太牢旨酒祀聖人于闕里孫翥記之○九月丞相火魯火孫與留夢炎等言十一月中書省臣奏皆以爲天下習儒者少而由刀筆吏得官者多帝曰將若之何對曰惟貢舉取士爲便凡蒙古

之士及儒吏陰陽醫術皆令試舉則用心爲學矣帝  
可其奏繼而許衡亦議學校科舉之法罷詩賦重經  
學定爲新制事雖未及行而選舉之制已立

二十三年二月帝御德興府行宮詔江南諸路學田  
昔皆隸官今復給本學以便教養○十二月大司農  
司上諸路學校凡二萬一百六十六所儲義糧九萬  
五百三十五石植桑棗雜菓諸樹二千三百九萬四  
千六百七十二株

二十四年旣遷都北城立國子學于國城之東廼以  
南城國子學爲大都路學自提舉以下設官有差○  
詔國子監立國學監官祭酒一員司業二員監丞一  
員學官博士二員助教四員生員百二十人蒙古漢  
人各半官給紙劄飲食仍隸集賢院設江南各道儒  
學提舉司諸縣各置教諭二人諸道各置提舉儒學  
二人統諸路府州縣學祭祀錢糧事復從桑哥言鈞  
考江西學田所入羨餘貯集賢院以給才藝之士○  
命御史臺以勉勵校官國子監學以訓誨胄子大司  
農以興舉社學提舉教授以主領外路儒生宿衛子

弟咸遣入學

二十五年冬十月詔免儒戶雜徭尚書省臣請令集賢院諸司分道鈎考江南郡學田所入羨餘貯之集賢院以給多才藝者從之

二十六年八月己亥始置回回國子學○九月己卯置高麗國儒學提舉司從五品

二十七年春正月癸丑敕從臣子弟入國子學立興文署掌經筵板及江南學田糧穀○五月括天下陰陽戶口仍令各處教官有精于藝者歲貢各一人○十

二月司農司上諸路所設學校二萬一千三百餘墾地千九百八十三頃有奇植桑棗諸樹二千二百五十二萬七千七百餘株義糧九萬九千九百六十石宣政院上天下寺宇四萬二千三百一十八區僧尼二十一萬三千一百四十八人

二十八年令江南諸路學及各縣學內設立小學選老成之士教之或自願招師或自受家學于父兄者亦從其便其他先儒過化之地名賢經行之所與好事之家出錢粟贍學者並立爲書院凡師儒之命于

朝廷者曰教授路府上中州置之命於禮部及行省  
及宣慰司者曰學正山長學錄教諭路州縣及書院  
置之路設教授學正學錄各一員散府上中州設教  
授一員下州設學正一員縣設教諭一員書院設山  
長一員中原州縣學正山長學錄教諭並受禮部付  
身各省所屬州縣學正山長學錄教諭並受行省及  
宣慰司劄付凡路府州書院設直學以掌錢穀從郡  
守及憲府官試補直學考滿又試所業十篇陞爲學  
錄教諭凡正長學錄教諭或由集賢院及臺憲等官  
舉充之諭錄歷兩考陞正長正長一考陞散府上中  
州教授上中州教授又歷一考陞路教授教授之上  
各省設提舉二員正提舉從五品副提舉從七品提  
舉凡學校之事後改直學考滿爲州吏例以下第舉  
人充正長備榜舉人充諭錄有薦舉者亦參用之自  
京學及州縣學以及書院凡生徒之肄業於是者守  
令舉薦之臺憲考覈之或用爲教官或取爲吏屬往  
往人材輩出矣○夏六月始置諸路陰陽學  
二十九年正月詔江南州縣學田聽其自掌春秋釋

奠外廩諸生及無告者貢士莊田令數數入官

三十年甲午春孔廟東廡頽址甃隙間檜復茁焉其  
芽時導江張顛來爲三氏學教授躬徙復於故處矢  
之曰此檜日茂則孔氏日興明年春翠色葱然又明  
年丙申秩滿去喜其言之有相也因識以銘曰茲檜  
有傳去聖伊何曰歲二千氣芳而達色殷而堅誰謂  
崑岡良玉以瘠誰謂斧斨美茹以連嘉種載衍有芽  
其卷茁乎甃間東廡之偏乃徙故處全其天然孔氏  
以興矢有言焉粵若三祀葱葱芊芊聖道以續聖澤  
以延肫肫其仁淵淵其淵自今以始千億萬年

職方氏曰是年距我

國朝洪武改元僅七十五年檜之復生乃開我中原  
盛治兆也迨弘治己未歲六月十六日廟災而檜  
復燬矣今其幹猶偃蹇向東南無有萌焉而碑鐫  
歌刻煩夥特甚蓋熒戊戌春謁拜所親見者聖人  
手澤關於世運今

國祚方于萬斯年而檜之生意醞釀固宜萌芽之無



朕也

三十一年壬申日南至鄒縣尹東陽司居敬記尼山孔子像曰設像事神非古也其尸禮旣廢之後乎漢文翁立學官成都蜀有文翁石室設孔子坐像其坐歛蹠向後屈膝當前上古以來君臣及七十二弟子繪事兩旁晉王右軍嘗簡蜀守寫倣之有宋嘉祐中王公素摹爲禮殿圖此像之最古者然皆漢衣冠也居敬學制鄒邑遷學舍于城西建孔子廟時孔顏孟三氏子孫教授張頴習于禮者也因問立像之制曰

古人席地而坐高臺隆袞旣已失之冕服之度傳訛甚矣闕里行教像顏子從後者顧愷之筆杏壇小影像吳道子筆及近年司寇像皆漢晉衣冠耳禮記儒行篇孔子自言少居魯衣縫掖之衣長居宋冠章甫之冠此孔子衣冠也縫掖深衣是已章甫玄冠是已深衣以布身二幅各四尺四寸袂二幅亦四尺四寸殺其袂而圜至祛爲尺有二寸不殊裳其裳十二幅兩傍殺之領緣祛皆緇束以革帶左右佩有殺無鞶加以大帶紐約用組黑履於是倣文翁石室作石像

章甫縫掖危坐謂孔子毓秀尼山奉而居之坤靈洞  
乃問冕服制則曰散在禮經注疏雖互有得失聚而  
求之可以考見顧讀者不之究耳古者冕服有等大  
要冕弁冠三者而已曰冕者大古謂之緇布冠加紘  
縱縹旒則後王之彌飾也其冠古以布而緇之周以  
純其下爲武謂圍首者武上有冠以繪爲之屈加於  
武內畢有襍積向左或十二或九或七或五或三武  
貫以衡衡之兩旁有纁纁繫以瑱懸以紕冠之上加  
覆謂之緹緹旁有紐貫之於衡前後垂縹旒如冠襍  
積之數旒以玉十二者五玉玄黃朱白蒼貫以五采  
縹如玉之色九旒七旒三玉朱白蒼三采五旒三旒  
二玉朱綠二采縹如玉之色固以紘紘繚於衡之左  
端加之緹上復繚於衡之右端繞於頤下再繚而結  
之結者謂之纓垂者謂之綏紘天子朱卿大夫青士  
緇而加以采次者弁以皮韋皆有會會謂縫飾會以  
玉如冕旒之數會之內以象爲之邛無襍積貫武以  
算統纁瑱纓皆冕之制次者冠玄冠是也委貌章甫  
其名雖殊其制相類如緇布冠等衰如弁之制此其

首服也古人衣身皆四尺四寸天子長袂袂八尺八寸公侯侈袂袂六寸服冕者衣以絲其色玄冕十二旒者衣十二章日月星辰山龍華蟲作繪宗彝藻火粉米黼黻絺繡華蟲以上在衣宗彝以下在裳日在左月在右星辰宜畫北極在北山之性止而靜龍布升降華蟲雉也宗彝二其一畫虎其一畫雉如猴形以尾卷物內鼻中火之性圓而不銳白與黑謂之黼如斧形黑與青謂之黻如兩已相背九章去日月星辰而登龍於山龍有降無升登藻於衣七章自華

蟲以下登火五章藻火粉米在衣裳黼黻三章衣唯粉米而裳黼黻七幅前三後四兩旁無殺縫其色纁束以革帶帶之前垂鞞鞞如裳之色純以爵韋純謂兩遍純以素純謂下緣十二章飾以龍九章火七章山五章三章無飾左右佩玉有珩璜琚瑀衡牙貫以蠙珠籍以綬綬有等上加大帶帶以素十二章朱裏終辟首卑九章素帶終卑七章五章素帶辟垂章率下辟帶紐約用組赤烏服弁者祭服以緇謂之紂衣裳帶鞞佩綬如冕之制朝服以布天子則素積祭服

朝服長袂侈袂如冕而服弁者通服玄端焉端身四尺四寸袂亦四尺四寸故有端之名冠服則玄端上士玄裳中士黃裳下士雜裳前玄後黃曰雜有鞞如裳之色帶佩有等黑屨玄冠深衣可也圭薦之而已既薦則共首非若後世執笏然笏則措於帶間亦不執也執笏自後周始亦古也既又作子思像于中庸精舍孟子像于孟子墓廬以鄒魯聖人之居四方於此觀禮故刻之尼山以俟好禮者有取焉

是年元成宗卽位七月詔中外崇奉孔子曰孔子之

道垂憲萬世有國家者所當崇率

職方氏曰按寧獻王通鑑博論于至元十八年有云常信桑門之感盡焚中國道藏闢儒道二教爲外學貶孔子爲中賢尊桑門爲正道及考元史止于是年焚毀道書而不見所謂貶孔子之實惟成宗本紀世祖正月崩成宗卽位是年七月詔中外崇奉孔子夫孔子自唐宋以來天下學校通祀之已非一日又何待至此始詔中外崇奉之哉意前此必有如博論所云者元史爲世祖諱故畧去之

耳

元成宗元貞元年五十三代孫密州尹孔治入朝璽書錫命中議大夫襲封衍聖公月俸百千秩視四品孔氏世爵弗傳者久至是乃復○命有司割地給諸路蒙古學生員餼廩其學官○詔曲阜林廟上都大都諸府諸縣邑廟學書院贍學士地及貢士莊以供春秋二丁朔望祭祀脩完廟宇自是天下郡邑廟學無不完葺釋奠悉如舊儀

元成宗大德初勅到任官先詣宣聖廟殿詢方許詣以次神廟著之甲令

大德二年六月除免孔氏子孫合納稅粟三十三石四斗二升

四年添設學正一員上自國學下及州縣舉生員高等從翰林考試凡學官譯史取以充焉○七月翰林學士閻中奉奏竊惟先聖文宣王之後自漢以來襲封公侯之爵俱有食邑歷代相仍至唐宋金視舊有加各依品秩頒支俸給國朝有天下累聖崇奉至元三十一年今上皇帝卽位首授五十三代孫密州知

州孔治中議大夫襲封衍聖公爵一品散官四品合  
得俸祿未蒙給賜古者任官然後爵之位定然後祿  
之上自一品下至司縣小吏俱有俸給况朝廷崇尚  
聖人之後既已頒降宣命獨領虛名未霑實祿豈稱  
爵祿相湏之義照得前代襲封各兼他職視其兼職  
以爲俸廩之差今既無兼職若止視散官品秩照依  
隨朝正四品例每月幫支俸鈔俾之有爵有祿以奉  
祭祀益見明時尊崇聖道之意

五年秋衍聖公詔遣其子曲阜令思誠以廟成聞且  
請廟碑會博選胄子入學擢思誠國子監丞特勅中  
書賜田五千畝以供築盛戶二十八以應洒掃下翰  
林書其事于石學士承旨閻復撰○冬十月又定生  
員散府二十人上中州十五人下州十人

六年六月甲子建文宣王廟于京師

八年冬十二月始定國子生蒙古色目漢人三歲各  
貢一人

九年八月給曲阜林廟灑掃戶以尚珍署田五十頃  
供歲祀○陞翰林國子院爲正二品

十年春正月營國子學于文宣王廟西偏○二月增  
生員廩膳通前三十員爲六十員○八月京師國子  
監文宣王廟成行釋奠禮牲用太牢樂用登歌新國  
學增廣黌舍數百區始備教養胄子之法○冬閏十  
月國子學定蒙古色目漢人生員二百人三年各貢  
二人

十一年七月辛巳武帝卽位加封孔子號曰大成至  
聖文宣王大都上都孔林差人依舊例致祭牲加太  
牢齋制詞香祝文制曰蓋聞先孔子而聖者非孔子

無以明後孔子而聖者非孔子無以法所以祖述堯  
舜憲章文武儀範百王師表萬世朕慕承丕緒敬仰  
休風循治古之良規舉追封之盛典加號大成至聖  
文宣王遣使闕里祀以太牢於戲父子之親君臣之  
義永唯聖教之尊天地之大日月之明奚罄名言之  
妙尚資神化祚我皇元與課銀三定表裏段子一十  
二疋并合用祭祀物件遣本院學士嘉議大夫王德  
淵到孔林卜于十一月丁卯與兗州知州馬禧孔氏  
家長撫行三獻禮祭文曰惟王秉德生知垂教不朽

聖之時者天何言哉由百世之後莫能違自生民以來未之有特加封號大展祭儀仍命臣僚往祀林廟以充國公鄒國公配尚饗○八月辛亥中書右丞字羅鐵木兒以國字譯孝經進詔曰此乃聖氏之微言自王公達於庶民皆當由是而行其命中書省刻板模印諸王而下皆賜之

元武宗至大二年春正月丙午定制大成至聖文宣王春秋二丁釋奠用太牢○六月以大都隸儒籍者四十戶充文廟樂工○頒降樂章迎神樂奏黃鍾凝安大哉宣

聖道德尊崇維持王化斯文是宗典祀有常精純並

隆神其來格於昭聖容升殿降殿樂奏南呂同安誕興斯文經天

緯地功加于民寔千萬世笙鏞和鳴粢盛豐備肅肅

降登歆茲秩祀奠幣樂奏南呂明安自生民來誰底其盛惟王

神明度越前聖粢帛具成禮容斯稱黍稷非馨惟神

之聽初獻樂奏南呂成安大哉聖王寔天生德作樂以崇時思

無斃清酤惟馨嘉牲孔碩薦脩神明庶幾昭格初獻充國

公樂奏南呂成安庶幾屢空淵源深矣亞聖宣猷百世宜祀

吉蠲斯辰昭陳樽簋旨酒欣欣神其來至初獻鄰國公樂奏南



安台成心傳忠恕一以貫之爰述大學萬世訓彝惠我

光明尊聞行知繼聖迪後是享是宜初獻沂國公樂奏南吕成安

公傳自曾孟傳自公有迪緒承允得其宗提綱開蘊

乃作中庸侑于元聖億載是宗初獻鄒國公樂奏南吕成安道之

由興於皇宣聖惟公之傳人得其正與享在堂情文

寔稱萬年承休格哉天命亞獻樂奏大吕文安道德淵源斯文

之宗功名糠粃素王之風芬兮斯牲芳兮斯酒綏我

無疆與天同久終獻樂奏沽洗成安百王宗師生民物軌瞻之

洋洋神其寧止酌彼金罍惟清且旨登獻惟三於嘻

成禮分獻十哲樂奏沽洗成安於昭哲人賢德之淳儒風光揚輔

世安仁椒漿斯旨蘭肴既陳于酌于獻福禧皆臻分獻

從祀宮調並前儼然冠纓崇然廟庭百王承祀涓辰惟丁于

牲于醑其從與享中之樂歌式昭師仰徹豆樂奏南吕娛安犧

象在前豆籩在列以享以薦既芬既潔禮成樂備人

和神悅祭則受福率遵無越送神樂奏南吕寧安有嚴學宮四

方來崇恪恭祀事威儀雍雍歆茲惟馨颺馭回復明

裡斯畢咸膺百福

二年定伴讀員四十人以在籍上名生員學問優長

者補之○冬十一月丁未擇衛士子弟充國子學生  
三年夏四月丙子增國子生為三百員

四年二月戊申元仁宗未即位先罷運江南所印佛  
經甲子命中書平章李孟領國子監學諭之曰學校  
人材所自出卿等宜數詣國學課試諸生勉其德業

○三月元仁宗即位詔以銀幣詣闕里祀孔子遣宦  
者李邦寧釋奠于孔子邦寧既受命行禮方就位忽  
大風起殿上及兩廡燭盡滅燭臺底鐵鑄入地尺許  
無不拔者邦寧悚息伏地諸執事者皆伏良久風息

乃成禮邦寧因慚悔累日○四月敕國子監師儒之  
職有才德者不拘品級雖布衣亦選用○閏七月增  
國子生為三百人仍增陪堂生二十人通一經者以  
次補伴讀○八月芝生國學大成殿○十月戊辰朔  
四日辛未帝遣資政大夫國子祭酒劉賡致祭于闕  
里文曰天以神器畀付朕躬受命維新若稽舊典肇  
脩禮類徧于羣神仰惟聖人模範百世功隆德盛宜  
極欽崇爰命儒臣恭詣闕里侑茲儀物牲用太牢昭  
薦厥誠尚祈鑒格以充國公鄒國公配尚饗○十二

月復立國子學試貢法蒙古授官六品色目正七品  
漢人從七品試蒙古生之法宜從寬色目生宜稍加  
密漢人生則全科場之制○乙未命李孟整飭國子  
監學

元仁宗皇慶二年六月建崇文閣于國子監以宋儒  
周敦頤程顥程頤張載邵雍司馬光朱熹張栻呂祖  
謙及故中書左丞許衡從祀孔子廟庭○十月中書  
省臣奏科舉事世祖裕宗累嘗命行成宗武宗尋亦  
有旨今不以聞恐或有沮其事者夫取士之法經學

實脩已治人之道詞賦乃摘章繪句之學自隋唐以  
來取人專尚詞賦故士習浮華今臣等所擬將律賦  
省題詩小義皆不用專立德行明經科以此取士庶  
可得人帝然之十一月乃下詔天下以皇慶三年

八月天下郡縣與其賢者能者充賦有司次年二月  
會試京師中選者朕將親策馬科場每三歲一次開  
試舉人從本貫官司於諸色戶內推舉年及二十五  
以上鄉黨稱其孝悌朋友服其信義經明行脩之士  
結罪保舉以禮敦遣資諸路府○蒙古色目人第一

場經問五條大學論語孟子中庸內設問用朱氏章句集註其義理精明文辭典雅者爲中選第二場策一道以時務出題限五百字以上漢人南人第一場明經經疑二問大學論語孟子中庸內出題並用朱氏章句集註復以己意結之限三百字以上經義一道各治一經詩以朱氏爲主尚書以蔡氏爲主周易以程氏朱氏爲主已上三經兼用古註疏春秋許用三傳及胡氏傳禮記用古註疏限五百字以上不拘格律第二場古賦詔誥章表內科一道古賦詔誥用古體章表四六參用古體第三場策一道經史時務內出題不矜浮藻惟務直述限一千字以上成蒙古色目人願試漢人南人科目中選者加一等注授蒙古色目人作一榜漢人南人作一榜第一名賜進士及第從六品第二及以下及第二甲皆正七品第三甲以下皆正八品兩榜並同○流官子孫廕敘並依舊制願試中選者優陞一等○在官未入流品願試者聽若中選之人已有九品以上資級比附一高加一等注授若無品級止依試例從優銓注○鄉試中

選者各給解據錄連取中科文行省移咨都省送禮部腹裏宣慰司及各路關申禮部拘該監察御史廉訪司依上錄連科文申臺轉呈都省以憑照勘。○鄉試八月二十日蒙古色目人試經問五條漢人南人明經義一道二十三日蒙古色目人試策一道漢人南人古賦詔誥章表内科一道二十六日漢人南人試第一道。○會試省部依鄉試例於次年二月初一日試第一場初三日第二場初五日第三場。○御試三月初七日前期奏委考試官二員監察御史二員

讀卷官二員於殿廷考試每舉子一名怯薛及一人看守漢人南人試策一道限一千字以上成蒙古色目人時務策一道限五百字以上成。○在內監察御史在外廉訪司官一員監試每處差考試官同考試官各一員並於見任并在閑有德望文學常選官內選差封彌官一員謄錄官一員選廉幹文資正官充之凡謄錄試卷并行移文字皆用朱書仍須設法關防毋致容私作弊省部會試都省選委知貢舉同知貢舉官各一員考試官四員監察御史二員彌封謄

錄對讀官監門等官各一員○鄉試行省一十一河  
南陝西遼陽四川甘肅雲南嶺北征東江浙江西湖  
廣宣慰司二河東山東直隸省部路分四真定東平  
大都上都○天下選合格者三百人赴會試於內取  
中選者一百人內蒙古色目漢人南人分卷考試各  
二十五人蒙古人取合格者七十五人大都十五人  
上都六人河東五人真定等五人東平等五人山東  
四人遼陽五人河南五人陝西五人甘肅三人嶺北  
三人江浙五人江西三人湖廣三人四川一人雲南  
一人征東一人色目人取合格者七十五人大都十  
人上都四人河東四人東平等四人山東五人真定  
等五人河南五人四川三人甘肅二人陝西三人嶺  
北二人遼陽二人雲南二人征東一人湖廣七人江  
浙一十人江西六人漢人取合格者七十五人大都  
一十人上都四人真定等十一人東平等九人山東  
七人河東七人河南九人四川五人雲南二人甘肅  
二人嶺北一人陝西五人遼陽二人征東一人南人  
取合格者七十五人湖廣一十八人江浙二十八人

江西二十二人河南七人○鄉試會試許將禮部韻  
畧外餘並不許懷挾文字差搜檢懷挾官一員每舉  
人一名差軍一名看守無軍人處差巡軍○差廉幹  
官一員度地安置席舍務令隔遠○舉人試卷各人  
自備三場文卷并草卷各一十二幅於卷首書三代  
籍貫年甲○凡就試之日日未出入場黃昏納卷受  
卷官送彌封所撰字號封彌訖送謄錄所○舉人與  
考試官有五服內親者自須迴避仍令同試官考卷  
若應避而不自陳者殿一舉○鄉試會試若有懷挾

及令人代作者漢人南人有居父母喪服應舉者並

殿二舉○國子監學歲貢生員及伴讀出身並依舊

制願試者聽中選者於監學合得資品上從優銓注

○知貢舉以下官會集至公堂議擬合行事目云

諸輒於彌封所取問舉人試卷封號姓名及漏泄者  
治罪諸試題未出而漏泄者許人告首諸對讀試卷  
官不躬親而輒令人吏對讀其對讀訖而差誤有礙  
考校者有罰諸謄錄人書寫不慎及錯誤有礙考校  
者重事責罰諸官司故縱舉人私將試卷出院及抵

應人知而為傳送者許人告首諸監試官掌試院事  
不得干預考校諸試院官在簾內者不許與簾外官  
交語諸色人無故不得入試廳諸舉人謗毀主司率  
衆喧競不服止約者治罪諸舉人就試無故不冠及  
擅移坐次者或偶與親姻隣坐而不自陳者懷挾代  
筆傳義者並扶出諸拆毀試卷首家狀者推治諸舉  
人於試卷書他語者駁放涉謗訕者推治諸試日為  
舉人傳送文書及因而受財者並許人告諸舉人於  
別紙上起草者出榜退落諸科文內不得自敘辛苦

門第委謄錄所點檢得如有違犯更不謄錄移文考  
試院出榜退落諸冒名就試別立姓名及受財為人  
懷挾代筆傳義者並許人告諸被黜而妄訴者治罪  
諸監門官譏察出入其物應入者拆封點檢諸巡捕  
官及兵級不得喧擾及輒視試文并容縱舉人無故  
往來非因公事不得與舉人私語諸試卷彌封用印  
訖以三不成字為號標寫仍於塗註一處用印○受  
卷官具受到試卷逐旋關發彌封官將家藏草卷腰  
封用印蒙古色目漢人南人分卷以三不成字撰號



每名累場同用一號於卷上親書及於曆內標附訖牒送謄錄官置曆分給吏人並用朱書謄錄正文仍具元卷塗註一及謄錄塗註一字數卷末書謄錄人姓名謄錄官具銜書押用印鈐縱牒送對讀所翰林掾史具謄錄訖試卷總數呈報監察御史對讀官以元卷與朱卷躬親對讀無差具銜書押呈解貢院元卷發還彌封所各所移並用朱書試卷照依元號附簿○試官考卷知貢舉居中試官相對向坐公同考校分作三等逐等又分上中下用墨筆批點考校既定收掌試卷官於號簿內標寫分數知貢舉官同試官監察御史彌封官公同取上元卷對號開拆知貢舉於試卷家狀上親書省試第幾名拆號既畢應有試卷並付禮部架閣貢舉諸官出院中書省以中選舉人分爲二榜揭于省門之左右○三月初四日中書省奏准以初七日御試舉人於翰林國史院定委監試官及諸執事初五日各官入院初六日譔策問進呈俟上采取初七日執事者望闕設案於堂前置策題於上舉人入院搜檢訖蒙古人作一甲序立禮

生導引至於堂前望闕兩拜賜策題又兩拜各就次  
色目人作一甲漢人南人作一甲如前儀每進士一  
人差蒙古宿衛士一人監視日午賜膳進士納卷畢  
出院監試官同讀卷官以所對策第其高下分爲三  
甲進奏作二榜用敕黃紙書揭于內前紅門之左右  
○前一日禮部告諭中選進士以次日詣闕前所司  
具香案侍儀舍人唱名謝恩放榜擇日賜恩崇宴于  
翰林國史院押宴以中書省官凡預試官並與宴預  
宴官及進士並簪華至所居擇日恭詣殿廷上謝恩  
表次日詣中書省參見又擇日諸進士詣先聖廟行  
舍菜禮第一人具祝文行事刻石題名於國子監  
元仁宗延祐元年三月辛亥命參知政事趙世延綱  
領國子學○夏四月復置回回國子監設監官以其  
文字便於關防取會數目令依舊制篤意領教○六  
月戊子置雲南行省儒學提舉司○八月復以齊履  
謙爲國子司業履謙酌舊制議立升齋積分法每季  
考學行以次第升旣升上齋踰再歲始與私試辭理  
俱優者一分半優者爲半分歲終積至八分者爲高

等禮部集賢歲選人以貢○請照國學例設管勾典籍司樂從之○又改孔氏學為三氏學益以顏孟二氏子孫○十二月己亥敕中書省定議孔子五十三代孫當襲封衍聖公者以名聞

二年二月己卯朔會試進士○三月芝生大成殿○

夏四月辛巳賜進士恩榮宴于翰林院辛丑賜會試下第舉人七十以上從七流官致仕六十以上府州

教授餘授山長學正後勿援例○秋八月壬寅增置

生員百人陪堂生二十人

元史本紀中云歲貢伴讀四員

用集賢學

士趙孟頫禮部尚書元明善等所議國子學貢試之法更定之一曰陞齋等第六齋東西相向下兩齋左曰游藝右曰依仁凡誦書講說小學屬對者隸馬中兩齋左曰據德右曰志道講說四書課肄詩律者隸馬上兩齋左曰時習右曰日新講說易書詩春秋科習明經義等程文者隸馬每齋員數不等每季考其所習經書課業及不違規矩者以次遞陞○冬十月以所設生員百人蒙古五十人色目二十人漢人三十人而百官子弟之就學者常不下二三百人宜增

其廩餼乃減去庶民子弟一百一十四員聽陪堂學業於見供生員一百名外量增五十名元置蒙古二十人漢人三十人其生員紙劄筆墨止給三十人歲凡二次給之

三年御史中丞趙世延言南北祭禮不宜有異當升曾思如典故制曰可先是四公列坐兩旁禮部謂翼承道統述明聖經作則萬世以立人極論德定名列次配侑東坐西向於禮爲稱○秋七月詔春秋釋奠于先聖以顏子曾子子思孟子配享封孟子父爲鄆

國公母爲邾國宣獻夫人

五年七月芝生大成殿

七年英宗卽位詔以白金一百五十兩錦綺雜綵表裏各一十三段遣說書王存義詣魯以太牢祀孔子上手香加額以授之祭文曰維王天縱至聖集厥大成儀範百王賢於堯舜嗣服伊始必祀告虔尚冀格思永昌文治以充國公鄆國公配尚饗○十一月丁酉詔各郡建帝師八思巴殿其制視孔子廟有加元英宗至治二年春正月戊寅敕有司存卹孔氏子

孫貧乏者○三月己巳中書省臣言國學廢弛請令  
中書平章政事廉恂參議中書事張養浩都事字木  
魯翀董之外郡學校仍命御史臺翰林院國子監同  
議興舉從之

三年八月泰定帝卽位十一月癸丑遣使詣曲阜以  
太牢祀孔子

元泰定帝泰定元年三月蒙古色目人年三十以上  
并兩舉不第者與教授以下與學正山長漢人南人  
年五十以上并兩舉不第者與教授以下與學正山

長有資品出身者更優加之不願仕者令備國子員  
後勿爲格自餘下第之士恩例不可常得間有試補  
書吏以登仕籍者惟已廢復興之後其法始變下第  
者悉授路府學正及書院山長又增取鄉試備榜亦  
授郡學錄及縣教諭於是科舉取士得人爲盛焉  
二年春閏正月以近歲公卿大夫子弟與凡民之子  
入學者衆其學官及生員五十餘人已給飲膳二十  
七人外助教一人生員二十四人廩膳並令給之  
四年二月戊子進襲封衍聖公孔思晦階嘉議大夫

○月丙申勅國子監仍舊制歲貢生員業成者六人○詔依禮官議釋奠宣聖依唐開元合行祭器禮料羊三豕三酒二十瓶奏登歌雅樂

元文宗天曆二年皇帝嗣歷二月癸巳命翰林侍講學士曹元用捧白金一百五十兩幣帛二十有六純祭闕里孔子廟○闕里之廟始自太宗九年令先聖五十一代孫襲爵衍聖公元措修之官給其費而代祠之禮則始于武宗牲用太牢禮物別給白金一百五十兩綵幣表裏各十三疋四年冬復遣祭酒劉賡

往祀牲禮如舊延祐末泰定天曆初載皆循是典錦幣雜綵有加焉○六月賜鳳翔府岐陽書院祀周文憲王仍命設學官春秋釋奠如孔子廟儀○秋七月遣使以上尊腊羊鈔十錠至大都國子監助仲秋上丁釋奠○九月癸未建顏子廟于曲阜所居陋巷元文宗至順元年春正月辛未中書省臣言科舉會試日期舊制以二月一日三日五日近歲改為十一月三十五請依舊制從之○閏七月戊申加封孔子父齊國公叔梁紇為啓聖王母魯國太夫人顏氏為

啓聖王太夫人妻鄆國夫人弁官氏爲大成至聖文  
宣王夫人顏子克國復聖公曾子邾國宗聖公子思  
沂國述聖公孟軻鄒國亞聖公河南伯程顥豫國公  
伊南伯程頤洛國公詔曰闕里有家系出神明之胄  
尼山請禱天啓聖人之生聿觀人文敦求往哲維孔  
子之有作集羣聖之大成原道統則堯授舜傳至周  
文王論世家則契至湯下逮正考父其明德也遠矣  
故生知者出焉有開必先克昌厥後如太極之生天  
地如鉅海之有本源雲仍旣襲於上公之封考妣宜  
眎夫素王之爵於戲君子之道考而不謬建而不悖  
于以敦典而敘倫宗廟之禮愛其所親敬其所尊于  
以報功而崇德尚篤其慶以相斯文齊國公叔梁紇  
加封爲啓聖王魯國太夫人顏氏加封啓聖王太夫  
人詔曰我國家惇典禮以彌文本閨門而成教乃瞻  
素王之廟尚虛元媿之封有其舉之斯爲盛矣大成  
至聖文宣王妻弁官氏來嬪聖室垂裕世家遵豆出  
房自流風於殷禮琴瑟在御存燕樂於魯堂功言邈  
若於遺聞儀範儼乎其合德作爾禕衣之像稱其命

鼎之名噫秩秩彞倫吾欲廣闢睢鵠巢之化皇皇文  
治天其興河圖鳳鳥之祥可特封大成至聖文宣王  
夫人制曰朕惟得孔氏之門入聖人之域顏子一人  
而已觀其不遷怒不貳過以成復禮之功無伐善無  
施勞益著爲仁之效蓋將不日而化矣惜天不假之  
年也朕緬懷哲人留心聖學將大新於風教故特侈  
於褒加於戲用之則行舍之則藏雖潛德一時之不  
顯吾見其進未見其止顧聖言百世而彌彰尚服寵  
光丕隆文治可加封曾子制堯國復聖公制曰昔曾子

得聖人之傳而子思克承厥統稽夫中庸之一書實  
開聖學於千載朕自臨御以來每以嘉惠斯文爲念  
萬機之暇覽睹載籍至於致中和而天地位萬物育  
惟留意焉夫爵職之崇旣隆於升配景行之意可後  
於褒加於戲有仲尼作於前孰儷世家之盛得孟子  
振其後益昌斯道之傳渥命其承茂隆丕緒可加封  
沂國述聖公制曰孟子百世之師也方戰國之縱橫  
異端之充塞不有君子孰任斯文觀夫七篇之書倦  
倦乎致君澤民之心凜凜乎拔本塞源之論黜霸功



而行王道距諛行而放淫辭可謂有功聖門追配神  
禹者矣朕若稽聖學祇服格言乃著新稱以彰渥典  
於戲誦詩書而尚友緬懷鄒魯之風非仁義則不陳  
期底唐虞之治英風千載蔚有耿光可加封鄒國亞  
聖公其祝幣之式祝版三各一尺二寸廣八寸木用  
楸梓栢文曰維年月日皇帝敬遣某官等致祭于大  
成至聖文宣王於先師曰維年月日某官等致祭于  
某國公幣三用絹各長一丈八尺其樂登歌其日用  
春秋二仲月上丁有故改用中丁○冬十月戊申朔  
降輿書申飭衍聖公崇奉孔子廟事○十一月望曲  
阜交國復聖公新廟落成○十二月己酉以董仲舒  
從祀孔子廟位列七十子之下國子生積分及等者  
省臺集賢院奎章閣官同考試中式者以等第試官  
不中者復入學肄業

二年四月乙未立閔子書院于濟南○六月乙巳朔  
監察御史韓元善言歷代國學皆盛獨本朝國學生  
僅四百員又復分辨蒙古色目漢人之額請凡蒙古  
色目漢人不限員額皆得入學○秋七月甲戌藝文

少監歐陽玄言先聖五十四代孫襲封衍聖公爵最  
五等秩登三品而用四品銅印於爵秩不稱詔鑄從  
三品印給之賜山東鹽運司歲課及江西浙江兩省  
學田歲入中統楮幣三十一萬四千五百緡昇濟寧  
路俾修曲阜廟庭○八月甲辰賜上都孔子廟碑  
三年衍聖公思晦請復尼山廟禮部尚書康思巖白  
于中書○五月勅濟寧路出官錢五萬二千餘緡脩  
葺曲阜孔廟衍聖公請依前代故事起圍墻四隅建  
樓倣王公之制奎章閣以聞天子允焉

元順帝元統元年詔免儒人役○十二月按問江西  
僉事任忙古召以墨坐沒私田八頃八十九畝屋二  
十七間家奴若干在鄆境者產俾孔氏襲封世業之  
家奴收役爲洒掃戶而輸其租制可歐陽玄記之  
元統二年三月己丑朔詔科舉取士國子學積分饒  
學錢糧儒人免役悉依累朝舊制學校官選有德行  
學問之人以充○五月贈顏子父無繇爲杞國文裕  
公追封顏子母齊姜氏爲齊國端獻夫人顏子妻宋  
戴氏爲兗國貞素夫人制曰朕惟孔子之道大矣學

之以復諸聖傳之而得其宗者其惟顏氏乎崇其道而褒封其所自出禮也故列聖以來於孔孟之考妣亦既褒錫之矣朕廸民興學議禮考文爰命有司稽顏氏之先世封之宗國節以一惠顧豈私於其家也哉享祀有嚴永世無極父無繇可贈杞國公謚文裕母齊姜氏追封杞國夫人謚端獻制曰朕惟顏子侑食孔聖春秋釋奠爲郡國通祀又有廟於魯其子孫祠祭二十三汨家人之禮爵秩固當及其配焉夫德足以相其君子則今之歆于世享以比隆闕里之家

不亦宜乎妻宋戴氏可追封兗國夫人謚貞素是年改塑杞國公像冕九旒服九章建杞國夫人及兗國夫人殿又割益都鄒縣牧地三十頃徵其歲入以給常祀○十二月甲戌詔整治學校

元統癸酉科廷試進士同同李齊等復增名額以及百人之數稍異其制左右榜各三人皆賜進士及第餘賜出身有差科舉取士莫盛于斯後三年其制遂罷又七年而復興遂稍變程式減蒙古色目人明經二條增本經義易漢南人第一場四書疑一道爲本

經疑增第二場古賦外於詔誥章表內又科一道此  
有元科目取士之制大畧如此若夫會試下第者自  
延祐創設之初丞相帖木迭兒阿散及平章李孟等  
奏下第舉人年七十以上者與從七品流官致仕六  
十以上者與教授元有出身者於應得資品上稍優  
加之無出身者與山長學正受省劄後舉不爲例今  
有來遲而不及應試者未曾區用取旨帝曰依下第  
例恩之勿著爲格

元順帝至元乙亥天子嗣登大寶命翰林脩撰于思  
誠奉祝文函香詣曲阜以太牢代祀孔子廟從集賢  
請遵舊典也○十一月庚辰勅以所在儒學貢士庄  
田租給宿衛衣糧詔罷科舉○十二月戊寅蒙古國  
子監成

至元二年前左丞王德懋議設尼山書院以彭澤爲山  
長國子助教陳繹曾爲碑銘○正月上田于柳林以  
上丁在邇允御史臺奏因宣聖五十四代孫監察御  
史孔思立出上尊酒釋奠于闕里遣御史從事高元  
肅驛致之

四年戊寅春正月詔脩曲阜孔子廟○八月五十五  
代孫曲阜世尹孔克欽創建洙泗書院

職方氏曰元順帝至元二年左丞左德懋議設尼  
山書院以彭播爲山長四年世尹克欽創建洙泗  
書院復有子思書院與汶上縣聖澤書院而四皆  
設山長五十三代演長洙泗五十四代思本長尼  
山五十三代煥長子思五十四代思範長聖澤此  
廟學外有書院而聖門爲學官外又得爲山長之  
始其後五十四代思迅五十五代克昌五十六代

希聖六十一代弘述皆長洙泗五十五代克信克  
剛皆長尼山五十四代思賢皆長子思國朝洪武  
二年惟洙泗尼山山長仍舊正德元年改尼山洙  
泗書院山長爲學錄而五十九代竒邃爲洙泗彥  
章爲尼山六十一代私舉繼之又于子思書院設  
翰林院世襲五經博士一員以襲封衍聖公嫡次  
子孫六十二代聞禮爲之六十三代貞寧繼之則  
四書院惟聖澤無聞而三書院之山長其二爲學  
錄一爲博士與三氏學學錄而四矣予惟汶上卽

中都孔子嘗宰之以此得建聖澤書院而文宗至  
順二年四月乙未立閔子書院于濟南則或以閔  
子嘗欲辭費宰居汶上而汶上之書院卽濟南之  
書院未可知也第其創廢之詳不可攷矣

五年己卯三月御史言曲阜聖廟成樹碑紀蹟賜中  
統二萬五千緡立碑○八月丁亥朔二十三日巳酉  
帝遣奉順大夫監察御史孔思立致祭曰伏以列聖  
右文宮廟旣葺立言成績貞石著辭裔孫承休作我  
司憲俾致嘉告以祚無疆謹以香酒太牢粢盛制幣  
式陳明薦尚饗

六年庚辰夏五月幸上都七月中書議遣翰林脩撰  
周伯琦馳驛奉香酒釋奠仲秋上丁癸亥上御龍光  
殿太府進香上手致敬大官出上尊四伯琦欽承以  
行○八月丁亥祠用太牢適秋亢旱省牲之夕雲合  
澤沛將事之晨天清月朗伯琦記之○十一月辛未  
以孔克堅襲封衍聖公○十二月復科舉取士制國  
子監積分生員三年一次依科舉例入會試中者取  
一十八名

元順帝至正二年壬午歲十二月戊戌朔二十二日  
丁巳帝遣集賢直學士郭孝基致祭曰惟王宗主名  
教表正彝倫並日月明同天地仁晝萬古之夜仁四  
海之民惟中國之爲中國實有賴於斯文欽惟皇上  
念闕里爲毓聖之地故特祭遣一介之臣香承手錫  
酒分上尊惟中書欽若休命用敬助相禮之錢緡牲  
牢旣設簋簠斯陳神之格思歆此明禋以充國公廟  
國公沂國公鄒國公配尚饗中書助祭元寶  
二千五百緡  
八年三月帝幸國子學賜衍聖公孔克堅銀印陞秩

從二品中奉大夫定弟子員出身及省親奔喪等制  
○四月上在興聖宮御宣文閣中書右丞相朶兒只  
等奏請立孔子父叔梁紇加封啓聖王碑昭示久遠  
命左丞相呂思誠撰文出中統紗五千貫下襲封府  
具攻石之用○秋七月二十日上御灤京水晶殿遣  
宣文閣授經郎董立以香酒乾羊致祭曲阜孔廟乃  
手香加額致敬久之以授孔思立出宣旨命  
十四年甲午鄒縣達魯花赤馬哈麻增塑顏魯思孟  
四公配享尼山書院大成殿中危素記之

十五年徵孔克堅爲同知太常禮儀院事攝太常卿  
累官國子祭酒○十月癸未中書參知政事實理門  
言舊立蒙古國子監專教四怯薛并各愛馬官員子  
弟今宜諭之依先例入學俾嚴爲訓誨從之○庚午  
以孔克堅之子希學爲襲封衍聖公

十六年正月戊子命中書平章政事帖里帖木兒提  
調國子監○二月己卯命集賢直學士楊俊民致祭  
曲阜孔子廟仍葺其廟宇

二十年十月國子學大成殿松栢樹有甘露降其上  
二十二年十二月追謚朱熹父爲獻靖制詞云考德  
而論時灼見風儀之後觀子而知父迨聞詩禮之傳  
久闕幽堂丕昭公論故宋左承議郎守尚書吏部員  
外郎熹史館校勘累贈通議大夫朱松仕不躁進德  
合中行遡鄒魯之淵源式開來學闡圖書之蘊奧妙  
契玄機奏對雖忤於權姦嗣續篤生於賢哲化民成  
俗著書滿家旣繼志述事之光前何節惠易名之孔  
後才高弗展嗟沉滯於下僚道大莫容竟昌明於永  
世神靈不昧休命其承可謚獻靖其改封熹爲齊國



公制詞云聖賢之遺教諸經義理實明於先正風節  
之厲垂諸世衰宗室間於異時不有鉅儒孰膺寵數  
故宋華文閣侍制果贈寶謨閣直學士太師追封徽  
國公謚文忠素養生異質蚤擢科名試用於郡縣而  
善政孔多迴翔於館閣而直言無隱權姦屢挫志慮  
不回著書立言嘉乃簡編之富愛君憂國負其經濟  
之長正學久達於中原漢號申行於仁廟詢諸僉議  
宜易故封國啓營丘爰錫太公之境土壤隣洙泗尚  
觀尼父之宮牆緬想英風載欽新命可追封齊國公  
餘並如故

至正二十五年秋七月命皇太子撫軍太子遣樞密  
院經歷魏元禮特祭先聖闕里

職方氏曰或問宣聖有作後世君王雖昏庸如漢  
靈亦知出王家穀祀春秋正五經文字刻石畫聖  
像及七十二弟子卽索虜女直蒙古非我族類而  
言及孔子未有不加額致敬有請必從至於亡國  
之君如陳后主修復孔廟齒冑太子唐玄宗之謚  
文宣王贈弟子爵宋徽宗之追封鯉伋增冕旒加

品戟元順帝之加封啓聖王追謚文公文皆備加  
優禮曲致光裕之思若宋之理度其表章儒先揚  
扞理學可謂品式備具而卒皆無救于敗亡何也  
曰是所以見天理之在人心者未嘗泯而秉彝好  
德之良卽雖下愚不能無道心也而况夷狄有君  
夫子固謂不若諸夏之亡則安得以夷狄而遂輕  
之至其有無救于敗亡者則帝王所當務豈僅僅  
一尊奉孔子遂足以了事而餘皆可一切置不治  
哉若理度之季則元兵日進疆宇日蹙方且保任  
奸回若史嵩之賈似道者開邊啓釁幽使納侮卽  
日享理學與聞俎豆亦何益于勝敗之數乎而一  
時諸臣居恒則發言盈庭臨危則束身遁野平日  
讀聖賢書自許謂何乃於此時作此舉措宜有以  
來朝堂之詔榜矣則亦不得盡諉過于君而不與  
其憂也孟子論爲政法先王之道而要于君臣各  
任其責肯哉言乎

宋史

程